

# Piginneqatigiilluni inissiat pillugit Inatsisartut peqqussutaat

Inigisaqartitsineq, inigisaqarnermut ikiorsiissuteqarneq, inigisanik attartortitsisarneq il.il. pillugit Kalaallit Nunaannut inatsimmi nr. 944-mi, 23. decembari 1986-imeersumi § 1 naapertorlugu makku aalajangersarneqarput:

## Kapitali 1

### *Atuuffia ilaalu ilanngullugit*

**§ 1.** Peqqussut manna piginneqatigiilluni inissiaatillit peqatigiiffinut, piginneqatigiilluni inissianik piginneqatigiilluni inissiaatillit peqatigiiffini ilaasortat atugassaannik sananissamik, pisinissamik, pigisaqarnissamik aqutsinissamillu siunertaqartunut atuuppoq.

*Imm. 2.* Piginneqatigiilluni inissiaatillit peqatigiiffiat ataaseq ikinnerpaamik sisamanik inissiartaqassaaq.

*Imm. 3.* Piginneqatigiilluni inissiaatit inissiatut quleriaatut imaluunniit inissiatut eqimasutut imaluunniit pukkitsutut sananeqassapput, aammalu piginneqatigiilluni inissiaatit ataasiakkaat tamarmik immikkut silamiit isertarfeqassapput, namminerisaminnik igaffeqassapput igasarfeqassallutilluunniit, kiisalu uffarfeqassapput perusuersartarfeqassallutillu. Piginneqatigiilluni inissiat pissusissamisoortumik ataatsimoortutut ilusiligaassapput.

*Imm. 4.* Pissutsini immikkut ittuni piginneqatigiilluni inissiat illutut ataasiakkaatut imaluunniit illutut affarleriittut sananeqarnissaat tiguneqarnissaalluunniit Naalakkersuisut akuerisinnaavaat.

**§ 2.** Piginneqatigiilluni inissiami inigisap annertussusaa inissiami init tamarmik annertussusaattut naatsorsorneqassaaq. Pequusiviit, quit, aneersuarterfiit, biilnut oqquisitsiviit biililluunniit unittarfi quliset, illup silammut iigaasa avataaniittut imaluunniit inissiamit immikkoortillugit inissiat, naatsorsuinermit ilanngunneqassanngillat, taakku oqorsarlugit inigisassatut atorineqassanngippata.

*Imm. 2.* Inigisap annertussusaa imatut naatsorsorneqassaaq:

1) Naqqup ataani inigisap annertussusaa naqqup ataata silammut iigaaniit takissusaa silissusaanut amerlisillugu uuttorneqassaaq. Naqqup ataa tamakkerluni atorineqanngippat, iikkat ilorliit, ininut naatsorsuinermit ilaatinneqartunut killiliisut qeqqiniit inigisap annertussusaa naatsorsorneqassaaq. Init naqqi tamakkerlutik cementimik betonimilluunniit qalligaanngitsut naatsorsuinermit ilaatinneqassanngillat.

2) Inini quleriiaani nalinginnaasuniittuni inissiami ataatsimi silataani iikkamiit imaluunniit qaliata silataaniit, tak. nr. 3, aamma inissiat akunnequtaasa qeqqanniit uuttorlugu takissusaa silissusaanut amerlisillugu inigisap annertussusaa naatsorsorneqassaaq. Ilaqutariinnut arlalinnut inissiani illup isui naatsorsuinermit inissiat akunnequtaasa affaattut ilanngunneqassapput. Qisuit qalliutit marluuppata, silataani qisummit allermiit uuttuisoqassaaq.

3) Qaliani inigisap annertussusaata naatsorsornerani illup takissusaa silissusaanut amerlisillugu naatsorsorneqassaaq. Takissusaa inini quleriiaani ataatsitut nalinginnaasutut uuttorneqassaaq, silissusaalu illup silataani qaliat qaavisa qaliap naqqaniit 1,5 meterinik portussuseqartut akornanni ungasissusaattut uuttorneqassalluni. Aniinganerit, soorlu qaliani aniingarnit iikkat inimut killiliissutaasut silataannut uuttorneqassapput.

*Imm. 3.* Naqqup ataani qalianilu inigisap annertussusaa, tak. imm. 2, nr. 1 aamma nr. 3, aatsaat init najugaqarfissatut suliarineqarsimappata ilanngunneqassapput.

*Imm. 4.* Init aalaakkaasumik natiligaanngitsut uuttortaanermut ilanngunneqassanngillat, taamaattorli tak. imm. 5.

*Imm. 5.* Inissiap iluani majuartarfiit naatsorsuineri inini quleriiaani tamani aqquteqarfigisaannut ilanngunneqassapput. Torsuusat, majuartarfiit majuartarfiillu sangoriaat ataatsimoorussat, illumi ininut kiassakkanut qallersuutit iluiniittut naapertuuttumik, annerpaamilli 11 kvadratmeterinik annertussusilerlugit naatsorsuineri ilanngunneqassapput.

**§ 3.** Piginneqatigiilluni inissiatillit peqatigiiffiat imaaliarluni inissianik pigisaqalersinnaavoq:

1) Piginneqatigiilluni inissiatillit peqatigiiffiat sanatitsisuulluni inissianik nutaanik sanaartornikkut, tak. kapitali 2.

2) Sanatitsisup namminersortup inissianik nutaamik sanaartukkanik piginneqatigiilluni inissiatillit peqatigiiffiannut tunniussineratigut, tak. kapitali 3.

3) Namminersornerullutik Oqartussat imaluunniit kommunip inissianik nutaamik sanaartukkanik piginneqatigiilluni inissiatillit peqatigiiffiannut tunniussineratigut, tak. kapitali 4.

4) Namminersornerullutik Oqartussat imaluunniit kommunip inissianik attartortittakkanik pioreersunik piginneqatigiilluni inissiatillit peqatigiiffiannut tunniussineratigut, tak. kapitali 5.

**§ 4.** Namminersornerullutik Oqartussat aamma kommuni kapitali 2-5-imi maleruagassat naapertorlugit piginneqatigiilluni inissiatillit peqatigiiffinut erniaqanngitsunik akilersugassaanngitsunillu taarsigassarsititsissapput.

**§ 5.** Naalakkersuisut aamma kommunalbestyrelsi taarsigassarsititsinissamik akuersinerminni, Inatsisartut peqqussutaanni matumani maleruagassani piumasarineqartut saniatigut illuutip imaluunniit piginneqatigiilluni inissiatillit peqatigiiffiata ingerlatsineranut sunniuteqarnissamik piumasaqarsinnaanngillat.

*Imm. 2.* Piginneqatigiilluni inissiatillit peqatigiiffiannut piginneqataasup aallaqqaatissatut akiliutissaanik, sanatitsisup namminersortup piginneqatigiilluni inissialiorneranut imaluunniit piginneqatigiilluni inissiatillit peqatigiiffiata piginneqatigiilluni inissiani taarsigassarsiaanut aningaasalersuisoq, Inatsisartut peqqussutaanni matumani maleruagassani piumasarineqartut saniatigut illuutip imaluunniit peqatigiiffiup ingerlanneqarneranut sunniuteqarnissamik piumasaqarsinnaanngilaq.

## Kapitali 2

*Piginneqatigiilluni inissiatillit peqatigiiffiat sanatitsisuulluni inissianik nutaanik sanaartorneq*

**§ 6.** Piginneqatigiilluni inissiatillit peqatigiiffiat inissianik nutaanik piginneqatigiilluni inissiatillit peqatigiiffianni ilaasortanit atorineqartussanik sanatillugu kapitali atorineqassaaq.

**§ 7.** Namminersornerullutik Oqartussat aamma kommuni piginneqatigiilluni inissiatillit peqatigiiffiata ataatsip § 6 naapertorlugu inissialiorneranut annertussusissanut aningaasartaliussassanullu killiliussat, imm. 2-mi aalajangersarneqartut iluanni sanaartornermut aningaasartuutit tamakkiisut 50%-iinik

erniaqanngitsunik akilersugassaanngitsunillu taarsigassarsititsisinnaapput. Affaat kommunimit aamma affaat Namminersornerullutik Oqartussanit taarsigassarsiaritinneqassapput.

*Imm. 2.* Namminersornerullutik Oqartussat aamma kommunip taarsigassarsiarititassai annerpaamik inissiami inigisap annertussusaanut 110 kvadratmeterinut, tamatumani inissiaq annertunerugaluarpalluunniit, aammalu sanaartornermut aningaasartuutitut tamakkisunut annerpaamik kvadratmeterimut ataatsimut 19.100 koruuninik, tamatumani sanaartornermut aningaasartuutissat annertunerugaluarpataluunniit, tunniunneqarsinnaapput.

*Imm. 3.* Namminersornerullutik Oqartussat aamma kommunip taarsigassarsiarititassaat aatsaat tunniunneqarsinnaapput sanaartornermut aningaasartuutissat imaluunniit § 49, imm. 2 naapertorlugu inissiamut piginneqataasup atuisinnaatitaaffigisaanut naligitinneqartup naleqqussakkap 5%-iinik piginneqataasut ataasiakkaat aningaasanngorlugit nammineerlutik aallaqqaatissatut akiliuteqarpata.

*Imm. 4.* Sanaartornermut aningaasartuutissanit tamakkiisunit sinneruttut piginneqatigiilluni inissiaatillit peqatigiiffiata nammineerluni aningaasalersussavai.

**§ 8.** Piginneqatigiilluni inissiaatit sananeqarnerannut kvadratmeterimut aningaasartuutissat naatsorsorneqarnerini agguaqatigiissitseriaaseq tunngavigineqassaaq, tassanilu piginneqatigiilluni inissiaatillit peqatigiiffiata sanaartornermut aningaasartuutissai tamakkiisut piginneqatigiilluni inissiaatini tamarmiusuni kvadratmeterit amerlassussaat tunngavigalugit agguaasoqassaaq.

*Imm. 2.* Sanaartornermut aningaasartuutini tamakkiisuni minnerpaamik sanaartornermut atatillugu aningaasartuutissat tamarmik ilaatinneqarsinnaapput, taakkununga ilaassallutik pilersaarusiornermut, sanasunut, sanaartornissamut taarsigassarsianut erniarititanut, sanaartorfissagissaanermut, attaviliinermut akitsuutitut, sanaartornermik aqutsinermut, teknikkikkut aningaasaqarnikkullu siunnersorteqarnermut, inatsisilerituumik siunnersorteqarnermut, aningaasalersuinermit siunnersorteqarnermut, allaffissornermut, aningaasalersuinermut, piginnittuunermut uppernarsaatip aamma qularnaveeqqusiussaqaarluni taarsigassarsinermit allagartat suliarineqarnerinut kiisalu naqissusiinermut uppernarsaatitut, aningaasartuutit.

**§ 9.** Namminersornerullutik Oqartussat aamma kommunip taarsigassarsiarititassaat siusinnerpaamik akilernerqassapput inissiat naammassineqareepata aammalu aatsaat atuilernissamut akuersisummik, sanaartornermut naatsorsuutitut inaarutaasumik suliamut attuumassuteqanngitsumit uppernarsarneqarsimasunik aamma qularnaveeqqusiussaqaarluni taarsigassarsinermit allagartap uparuagassartaqanngitsup naqeqqaarneranik nalunaarsorsimasumik naqissusersimasumillu kiisalu sillimmasiisummik takutitsinikkut.

*Imm. 2.* Taarsigassarsiaritit piginneqatigiilluni inissiaatillit peqatigiiffiata illuutaasa qularnaveeqqusiunneqarnerisigut qularnaarneqassapput akilernerqartussanik tulleriinnilersuinermit ingiaqatigiittussanngorlugit inissinneqassallutik. Taarsigassarsianut qularnaveeqqut illu qularnaveeqqusiullugu sanaartornermut aningaasartuutitut tamakkiisunit sinneruttunut aningaasalersuutissatut, tak. § 7, imm. 4, taarsigassarsiarititaasimasut akilereernerini akilernerqartussatut inissisimassaaq.

**§ 10.** Inissianik sanaartornissamut taarsigassarsinissamik qinnuteqaatit kommunalbestyrelsimi suliarissanngorlugit nassiuunneqassapput.

*Imm. 2.* Qinnuteqaammut ilanngunneqassapput:

- 1) Pilersitsinermut isumaqatigiissut, pilersitsisunit tamanit atsiorneqarsimasoq.
- 2) Piginneqatigiilluni inissiaatillit malittarisassaat.

3) Pilersaarusiarnut nassuiaat, inissiat amerlassusaannik inigisallu katillugit annertussusaanik paasissutissartalik.

4) Sananermi sanaartornermut aningaasartuutit tamakkiisut takussutissiornerat.

5) Kommunalbestyrelsimit nunaminertamik tunineqarnissamut neriorsuutaagallartoq.

6) Piginneqataasut aamma piginneqatigiilluni inissiatillit peqatigiiffiata namminneerlutik aningaasalersuutissaminnik pissarsisinnaaneranngut uppersaat.

**§ 11.** Qinnuteqaat nassiunneqartoq tunngavigalugu taarsigassarsititsinissamik neriorsuut qinnutigineqartoq tunniunneqarsinnaanersoq kommunalbestyrelsi isummissaaq.

*Imm. 2.* Taarsigassarsiaritassat akuersissutigineqarnissaannut piumasarineqarpoq:

1) Sanasussanngut akigitinneqartussat pillugit pisussaaffiliisumik isumaqatigiissuteqartoqarsimannginnissaa, aammalu sanaartugassat aallartinneqarsimannginnissaat.

2) Sanatitsisutut suliasamut siunnersortimik pikkorisumik piginneqatigiilluni inissiatillit peqatigiiffiata pissarsisimanissaa.

3) Sanaartukkami piffissami sanaartorfiusumi sanaartornermut pilersaarusiornermullu inatsisit atuuttut naammassineqarsimanissaat.

**§ 12.** Kommunalbestyrelsi taarsigassarsititsinissamik neriorsuummik tunniussiguni, tamanna pillugu kommunalbestyrelsi Naalakkersuisunut nalunaaruteqassaaq.

*Imm. 2.* Kommunalbestyrelsi taarsigassarsititsinissamik neriorsuummik tunniussisimappat piginneqatigiilluni inissiatillit peqatigiiffiat Naalakkersuisunit taarsigassarsitinneqarnissamik neriorsorneqarnissamik pisinnaatitaaffeqarpoq. Namminersornerullutik Oqartussat taarsigassarsititsinissaannut kommunip taarsigassarsititsisimanissaa piumasaqaataavoq.

**§ 13.** Namminersornerullutik Oqartussat aamma kommunip taarsigassarsititsinissamik akuersippata, Naalakkersuisut aamma kommunalbestyrelsi taarsigassarsititsinissamik neriorsuummik tunniussisapput, tassanilu taarsigassarsiaritassat amerlassuserigallagassaat taarsigassarsititsinermullu atugassarititaasut allassimassapput.

*Imm. 2.* Taarsigassarsiaritassat inaarutaasumik annertussusissaat, sanaartornermut naatsorsuutit arlaannaannulluunniit attuumassuteqanngitsumit akuersit tunngavigalugit naatsorsorneqassapput.

*Imm. 3.* Sanaartornermut aningaasartuutissanngut missingersuusiat, taarsigassarsiat akuerineqarnerannut tunngaviusimasut allannguuteqarpata, aammalu allannguutit taarsigassarsiat inaarutaasumik annertussusissaannut sunniuteqartussanngorpata, piginneqatigiilluni inissiatillit peqatigiiffiata tunngavissaqanngitsumik kinguarsaanertaqanngitsumik tamanna Naalakkersuisunut aamma kommunalbestyrelsimut nalunaarutigissavaa. Tamanna pinngippat taarsigassarsiat inaarutaasut neriorsuutigineqartunit annertunerulersinneqasinnaangillat.

**§ 14.** Sanaartorneq Naalakkersuisunit taarsigassarsititsinissamik neriorsuutitut allakkiap suliarineqarnerani ulluliussamiit ukiut marluk qaangiutsinnagit aallartinneqarsimassaaq, aammalu ukiut pingasut qaangiutsinnagit naammassineqarsimassalluni atorneqalersimassallunilu. Tamanna pinngippat neriorsuut siunngut ilisimatitsinertaqanngitsumik atorunnaarsinneqassaaq.

*Imm. 2.* Piginneqatigiilluni inissiatillit peqatigiiffiat taarsigassarsititsinissamik neriorsuutitut allakkiap suliarineqarnerani ulluliussamiit ukiut marluk qaangiutsinnagit sanaartorneq aallartinneqareersimanersoq aallartinneqareersimannginnersorluunniit pillugu paasissutissanik Naalakkersuisunut nassiussissaaq. Sanaartorneq aallartinneqareersimappat tamanna pillugu nalunaarut, piginneqatigiilluni inissiatillit

peqatigiiffiata suliarisimasaa aammalu kommunalbestyrelsimit uppersarsarneqarsimasooq ilanngunneqassaaq.

*Imm. 3.* Piginneqatigiilluni inissiatillit peqatigiiffiata Naalakkersuisunit taarsigassarsititsinissamik neriorsuutitut allakkiap suliarineqarnerani ulluliussamiit ukiut pingasut qaangiutsinnagit atuilernissamut akuersissutip assilineri Namminersornerullutik Oqartussanut aamma kommunimut nassiutissavaa.

*Imm. 4.* Sanaartornerup kinguaattoornerani kommunalbestyrelsip inassuteqareerneratigut imm. 1-mi piffissamut killissarititassatut allassimasut saneqqunneqarnissaannut immikkut ittumik Naalakkersuisut akuersissuteqarsinnaapput. Tamanna pissappat imm. 3-mi piffissamut killissarititassatut allassimasut immikkut akuersissummut naapertuuttunngorlugit nikisinneqassapput.

### Kapitali 3

*Sanatitsisoq namminersortoq sanatitsisuulluni, piginneqatigiilluni inissiatillit peqatigiiffiannut tunniunneqartussanik inissialianik nutaanik sanaartorneq*

**§ 15.** Sanatitsisoq namminersortoq inissianik nutaanik, piginneqatigiilluni inissiatillit peqatigiiffiannut tunniunneqarnissaat siunertaralugu sanasinnaavoq.

**§ 16.** Naalakkersuisut aamma kommunalbestyrelsi tamarmik immikkut § 15 naapertorlugu inissianik sanaartornissamut angissusissatut aningaasartassatullu killissarititaasut, imm. 2-mi aalajangersarneqartut iluanni sanaartornermi aningaasartuutissat tamakkiisut 25%-iinik erniaqanngitsunik akilersugassaanngitsunillu taarsigassarsititsinissamut neriorsuuteqarsinnaapput.

*Imm. 2.* Namminersornerullutik Oqartussat aamma kommunip taarsigassarsiarititassai inissiami inigisap annertussusaanut annerpaamik 110 kvadratmeterinut, tamatumani inissiaq annertunerugaluarpallunniit, aammalu sanaartornermut aningaasartuutitut tamakkisunut annerpaamik kvadratmeterimut ataatsimut 19.100 koruunit, tamatumani sanaartornermut aningaasartuutissat annertunerugaluarpatalunniit, tunniunneqarsinnaapput.

*Imm. 3.* Sanatitsisup namminersortup aatsaat sanaartornermut aningaasartuutitut tamakkiisunit sinneruttut nammineerluni akilerpagit taarsigassarsititsinissamik neriorsuuteqartoqarsinnaavoq.

*Imm. 4.* Naalakkersuisut aamma kommunalbestyrelsip taarsigassarsititsinissamik neriorsuutaat inissianut peqatigitillugu piginneqatigiilluni inissiatillit peqatigiiffiannut tunniunneqassaaq.

**§ 17.** Inissianik sanaartornissamut taarsigassarsitinneqarnissamik neriorsuummik qinnuteqaat kommunalbestyrelsimi suliaannngorlugu nassiunneqassaaq.

*Imm. 2.* Qinnuteqaammut ilanngunneqassapput:

- 1) Pilersaarusiarnut nassuiaat, inissiat amerlassusaannik inigisallu katillugit annertussusaanik paasissutissartalik.
- 2) Sananermi sanaartornermut aningaasartuutitut tamakkiisut takussutissiornerat.
- 3) Kommunilbestyrelsimi nunaminertamik tunineqarnissamut neriorsuutaagallartoq.
- 4) Sanatitsisup namminersortup sanaartornermut aningaasartuutitut tamakkiisunit sinneruttut pissarsiarisinaanannut uppersarsaat.

**§ 18.** Qinnuteqaat nassiunneqartoq tunngavigalugu taarsigassarsititsinissamik neriorsuut qinnutigineqartoq tunniunneqarsinnaanersoq kommunalbestyrelsi isummissaaq.

*Imm. 2.* Taarsigassarsiarititassat akuersissutigineqarnissaannut piumasarineqarpoq:

- 1) Sanasussanut akigitinneqartussat pillugit pisussaaffiliisumik isumaqatigiissuteqartoqarsimannginnissaa, aammalu sanaartugassat aallartinneqarsimannginnissaat.

2) Sanaartukkami piffissami sanaartorfiusumi sanaartornermut pilersaarusionermullu inatsisit atuuttut naammassineqarsimanissaat.

**§ 19.** Kommunalbestyrelsi taarsigassarsititsinissamik neriorsuummik tunniussiguni, tamanna pillugu kommunalbestyrelsi Naalakkersuisunut nalunaaruteqassaaq.

*Imm. 2.* Kommunalbestyrelsi taarsigassarsititsinissamik neriorsuummik tunniussisimappat sanatitsisoq namminersortoq Naalakkersuisunit taarsigassarsitinneqarnissamik neriorsorneqarnissamik pisinnaatitaaffeqarpoq. Namminersornerullutik Oqartussat taarsigassarsititsinissaannut kommunip taarsigassarsititsinissaa piumasaqaataavoq.

**§ 20.** Namminersornerullutik Oqartussat aamma kommuni taarsigassarsititsinissamik akuersippata, Naalakkersuisut aamma kommunalbestyrelsi taarsigassarsititsinissamik neriorsuummik sanatitsisumut namminersortumut tunniussissapput, tassanilu taarsigassarsiarititassat amerlassuserigallagassaat taarsigassarsititsinermullu atugassarititaasut allassimassapput.

*Imm. 2.* Taarsigassarsiarititassat inaarutaasumik annertussusissaat, sanaartornermut naatsorsuutit suliamut attuumassuteqanngitsumit akuerisat tunngavigalugit naatsorsorneqassapput.

*Imm. 3.* Sanaartornermut aningaasartuutissanut missingersuusiat, taarsigassarsiat akuerineqarnerannut tunngaviusimasut allannguuteqarpata, aammalu allannguutit taarsigassarsiat inaarutaasumik annertussusissaannut sunniuteqartussanngorpata, sanatitsisup namminersortup tunngavissaqanngitsumik kinguaasaanartaqanngitsumik tamanna Naalakkersuisunut aamma kommunalbestyrelsimut nalunaarutigissavaa. Tamanna pinngippat taarsigassarsiat inaarutaasut neriorsuutigineqartunit annertunerulersinneqasinnaanngillat.

**§ 21.** Sanaartorneq Naalakkersuisunit taarsigassarsititsinissamik neriorsuutitut allakkiap suliarineqarnerani ulluliussamiit ukiut marluk qaangiutsinnagit aallartinneqarsimassaaq, aammalu ukiut pingasut qaangiutsinnagit naammassineqarsimassalluni atorneqalersimassallunilu. Tamanna pinngippat neriorsuut siumut ilisimatitsinertaqanngitsumik atorunnaarsinneqassaaq.

*Imm. 2.* Sanatitsisoq namminersortoq taarsigassarsititsinissamik neriorsuutitut allakkiap suliarineqarnerani ulluliussamiit ukiut marluk qaangiutsinnagit sanaartorneq aallartinneqareersimanersaq aallartinneqareersimannginnersorluunniit pillugu paasissutissanik Naalakkersuisunut nassiussissaaq. Sanaartorneq aallartinneqareersimappat tamanna pillugu nalunaarut, sanatitsisup namminersortup suliarisimasaa, aammalu kommunalbestyrelsimut uppersarsarneqarsimasooq ilanngunneqassaaq.

*Imm. 3.* Sanatitsisup namminersortup Naalakkersuisunit taarsigassarsititsinissamik neriorsuutitut allakkiap suliarineqarnerani ulluliussamiit ukiut pingasut qaangiutsinnagit atuilernissamut akuersissutip assilinera Namminersornerullutik Oqartussanut aamma kommunimut nassiutissavaa.

*Imm. 4.* Sanaartornerup kinguaattoornerani kommunalbestyrelsip inassuteqareerneratigit imm. 1-imi piffissamut killissarititassatut allassimasut saneqqunneqarnissaannut immikkut ittumik Naalakkersuisut akuersissuteqarsinnaapput. Tamanna pissappat imm. 3-mi piffissamut killissarititassatut allassimasut immikkut akuersissummut naapertuuttunngorlugit nikisinneqassapput.

**§ 22.** Sanatitsisup namminersortupkingusinnerpaamik atuilernissamut akuersissutip tunniunneqarnerani inissiat piginneqatigiilluni inissiaatillit peqatigiiffannut, pisinermut akiummik, sanatitsisumit aalajangerneqarsimasumik tamakkiisumik akilersillugit tunniutissavai. Taamaattoqanngippat taarsigassarsititsinissamik neriorsuut atorunnaassaaq, tamatumani Naalakkersuisut allamik aalajangiisimanngippata.

*Imm. 2.* Pisinermut akiumumut tamakkiisumut minnerpaamik pisinermut atatillugu aningaasartuutit

tamakkiisut ilanngunneqassapput, taakkununga ilaallutik teknikkikkut aningaasaqarnikkullu siunnersorteqarnermut, inatsisilerituumik siunnersorteqarnermut, aningaasalersuinermini siunnersorteqarnermut, allaffissornermut, aningaasalersuinermut, piginnittuunerupput uppersaati aamma qularnaveeqqusiussaqarluni taarsigassarsinermini allagartat suliarineqarnerinut kiisalu naqissusiinerupput uppersaatinut aningaasartuutit.

**§ 23.** Inissiat sanatitsisumit namminersortumit sananeqartut piginneqatigiilluni inissiatillit peqatigiiffianni ilaasortanit amerlaneruppata, sanatitsisup kommuni piginneqataassutissanik inuttaqanngitsunik piginneqataalernissaanik neqeroorfigissavaa.

*Imm. 2.* Kommuni neqeroorfigineqarnermini piginneqatigiilluni inissiatillit peqatigiiffianni piginneqataalernissani kissaatiginngippagu, sanatitsisup Namminersornerullutik Oqartussat piginneqataassutissanik inuttaqanngitsunik piginneqataalernissaannik neqeroorfigissavaa.

*Imm. 3.* Namminersornerullutik Oqartussat neqeroorfigineqarnermini piginneqatigiilluni inissiatillit peqatigiiffianni piginneqataalernissaminnik kissaateqanngippata, sanatitsisoq nammineerluni piginneqatigiilluni inissiatillit peqatigiiffianni piginneqataasutut inississaaq.

**§ 24.** Kommuni, Namminersornerullutik Oqartussat sanatitsisorluunniit piginneqatigiilluni inissiatillit peqatigiiffianni piginneqataasutut inissinnermini, Inatsisartut peqqussutaanni matumani maleruagassani piumasarineqartut saniatigut piginneqatigiilluni inissiatillit peqatigiiffiata ingerlatsineranut sunniuteqarnissamik piumasaqarsinnaanngillat.

*Imm. 2.* Piginneqatigiilluni inissiatillit peqatigiiffiata ineqarnermut akitsuut, inissiamut atuisinnaatitaaffiusumut aalajangerneqartoq kommunimut, Namminersornerullutik Oqartussanut sanatitsisumulluunniit piginneqataalersumut akilersissavaa. Tamatuma kingorna Namminersornerullutik Oqartussat, kommunip sanatitsisulluunniit namminersortup inissiaq inissianik attartortitsisarneq pillugu Inatsisartut peqqussutaanni namminersorluni attartortitsisarnermut maleruagassat sukkulluunniit atuuttut malillugit attartortissinnaalissavaat.

*Imm. 3.* Kommuni, Namminersornerullutik Oqartussat sanatitsisorluunniit pisussaapput, piginneqataassutiminnik inunnut, piginneqatigiilluni inissiatillit peqatigiiffiata akuersineratigut piginneqatigiilluni inissiatillit peqatigiiffianni ilaasortanngorsinnaasunut tunniussiniassallutik.

**§ 25.** Naalakkersuisut aamma kommunalbestyrelsen sanatitsisumut namminersortumut taarsigassarsititsinissamik neriorsuutaat piginneqatigiilluni inissiatillit peqatigiiffiannut tunniunneqassaaq.

*Imm. 2.* Namminersornerullutik Oqartussat aamma kommunip taarsigassarsiarititassaata aatsaat tunniunneqarsinnaapput pisinerupput akigititaasup imaluunniit § 49, imm. 2 naapertorlugu inissiamut piginneqataasup atuisinnaatitaaffigisaanut naligitinneqartup naleqqussakkap 5%-iinik piginneqataasut ataasiakkaat aningaasanngorlugit nammineerlutik aallaqqaatissatut akiliuteqarpata.

*Imm. 3.* Sanaartornerupput aningaasartuutissanit tamakkiisunit sinneruttut piginneqatigiilluni inissiatillit peqatigiiffiata nammineerluni aningaasalersussavai.

**§ 26.** Inissiat tunniunneqarnerinut nalunaarut Naalakkersuisunut aamma kommunalbestyrelsimut nassiunneqassaaq.

*Imm. 2.* Nalunaarummut ilanngunneqassapput:

- 1) Pilersitsinerupput isumaqatigiissut, pilersitsisunit tamanit atsiorneqarsimasooq.
- 2) Piginneqatigiilluni inissiatillit malittarisassaata.
- 3) Pisinerupput uppersaata atsiorneqarsimasooq.

4) Piginneqataasut aamma piginneqatigiilluni inissiaatillit peqatigiiffiata namminneerlutik aningaasalersuutissaminnik pissarsisinnaanerannut uppernarsaat.

**§ 27.** Namminersornerullutik Oqartussat aamma kommunip taarsigassarsiarititassaat siusinnerpaamik akilernerqassapput inissiat naammassineqareepata aammalu aatsaat atuilernissamut akuersisummik, pisinissamik isumaqatigiisummik atsiorsimasumik, qularnaveeqqusiussaqaarluni taarsigassarsinermi allagartamik nalunaarsorsimasumik naqissusersimasumillu kiisalu sillimmasiisummik takutitsinikkut.

*Imm. 2.* Taarsigassarsiarititap piginneqatigiilluni inissiaatillit peqatigiiffiata illuutaasa qularnaveeqqusiunnerisigut qularnaarneqassapput, akilernerqartussanik tulleriinnilersuinermi ingiaqatigiittussanngorlugit inissinneqassallutik. Taarsigassarsianut qularnaveeqqut illu qularnaveeqqusiullugu pisinermut akigititaasup tamakkiisut sinnerinik aningaasalersuutissatut taarsigassarsiarititaasimasut akilereernerini akilernerqartussatut inissisimassaaq, tak. § 25, imm. 3.

**§ 28.** Inigisap annertussusaanut kvadratmeterimut ataatsimut piginneqatigiilluni inissiaatip akiata naatsorsorneqarnerani agguaqatigiissitseriaaseq tunngavigineqassaaq, tassanilu piginneqatigiilluni inissiaatillit peqatigiiffiata pisinermut akia tamakkiisoq piginneqatigiilluni inissiaatini inigisap kvadratmeterinngorlugu katillugu annertussusaanut agguarneqassaaq.

#### **Kapitali 4**

*Namminersornerullutik Oqartussat imaluunniit kommunip tunniussinissaq siunertaralugu inissianik sanaartornerat*

**§ 29.** Namminersornerullutik Oqartussat aamma kommuni tamarmik immikkut piginneqatigiilluni inissiaatillit peqatigiiffiannut tunniussinissaq siunertaralugu inissialiortitersinnaapput, taakkunungalugu ilaapput piginneqatigiilluni inissiaatillit peqatigiiffii Namminersornerullutik Oqartussat imaluunniit kommunip kisimiillutik piginneqataaffigisaat. Kapitali 3 taamatuttaaq atorineqassaaq, tassanili § 24, imm. 3 atorineqassanngilaq.

*Imm. 2.* Namminersornerullutik Oqartussat imaluunniit kommuni sanaartornermut aningaasartuutit tapiissuteqarfigineqarsinnaasut tamakkiisut 50%-iinik erniaqanngitsunik akilersugassaanngitsunillu taarsigassarsititsissapput.

*Imm. 3.* Namminersornerullutik Oqartussat imaluunniit kommunip imm. 2 malillugu taarsigassarsiarititassai annerpaamik inissiami inigisap annertussusaanut 110 kvadratmeterinut, tamatumani inissiaq annertunerugaluarpalluunniit, aammalu sanaartornermut aningaasartuutitut tamakkisunut annerpaamik kvadratmeterimut 19.100 koruuninik, tamatumani sanaartornermut aningaasartuutissat annertunerugaluarpataluunniit, tunniunneqarsinnaapput.

#### **Kapitali 5**

*Pisortat inissiaataannik attartortittakkanik piginneqatigiilluni inissiatut tigusineq*

**§ 30.** Pisortat illuutaanni attartortittakkanik inissiaartaqartumi attartortut piginneqatigiilluni inissiaatillit peqatigiiffiannik pilersitsinissamut, aammalu inissianik attartukkaminik piginneqatigiilluni inissiatut tigusinissamut pisinnaatitaaffeqarput, taamaattorli tak. imm. 2 aamma 4.

*Imm. 2.* Illuummi attartortittakkanik inissiaartaqartumi attartortut, inissianik attartukkaminik piginneqatigiilluni inissiaatitut tigusinissamik kissaateqartut, illuummi attartortittakkanik inissiaartaqartumi tamarmiusumi attartortut tamakkiisut 55%-erissavaat. Inissiami ataatsimi attartortoq



ataasiinnartut naatsorsorneqartarpoq, attartornermut isumaqatigiisummi allassimasut amerlassusaat apequtaatinngu.

*Imm. 3.* Illuummi attartortittakkanik inissartaqartumi attartortut tamarmik piginneqatigiilluni inissiatillit peqatigiiffiannit piginneqatigiilluni inissiatillit peqatigiiffiannut ilaasortanngornissamik allakkatigut neqeroorfigineqassapput.

*Imm. 4.* Tigusinissamut pisinnaatitaaffeqarnek ukununga atuutinngilaq:

- 1) Illut ilaqutariinnut ataatsinut inissiat aamma illut affarleriit.
- 2) Inissiat innarluutilinnut imaluunniit pitsorluttunut immikkut sanaajusut imaluunniit ilusilersugaasut, aamma inissiat sullivimmuat atillugu inissiasatut immikkoortinneqarsimasut.
- 3) Inissiat utaqqiisigalugu inigitatut imaluunniit illusisimmavittut atorineqartut.
- 4) Inissiat imaluunniit illuutit, piginnittumit siunertamut aalajangersimasumut imaluunniit sulisorisanut inissiatut immikkoortinneqarsimasut.
- 5) Inissiat iluarsaassinernut isaterinernullu atillugu Namminersornerullutik Oqartussat imaluunniit kommunip inissarsissusseqqinnissamik pisariaqartitsineri naammassiniarlugit atorineqartut.
- 6) Inissiat isumaginninnikkut inissaqartitsiniarnermik ajornartorsiuteqarnermik aqqiissutissatut kommunimut atugassanngortinneqartut.

**§ 31.** Pisortat illuutaat attartortittakkanik arlalinnik inissartaqartoq tamakkerlugu taamaallaat tiguneqarsinnaavoq, taamaalillunilu piginneqatigiilluni inissiatillit peqatigiiffiat illuut attartortittakkanik inissartaqartoq tamakkerlugu piginnittussaataalissalluni.

*Imm. 2.* Illuut nappaarissunik akunneqarluni, soorlu silami iikkat nikingasumik sananeqarsimallutik, immikkoortunik majuartarfeqarluni imaluunniit immikkut isertarfeqarluni illuutinut arlalinnut agorneqarsinnaappat, illuutit ataasiakkaat immikkoortillugit tiguneqarsinnaapput.

*Imm. 3.* Illuutit arlallit pissusissamisoortumik ataatsimoorlutik inissisimappata, illuutit taakku piginneqatigiilluni inissiatillit peqatigiiffiannit ataatsimit tiguneqarsinnaapput.

**§ 32.** Attartortut pisortat illuutaannik attartortittakkanik inissartaqartunik piginneqatigiilluni inissianngortitsinissamik qinnuteqaataat illuutip attartortittakkanik inissartaqartup piginnittuanut, tassalu Namminersornerullutik Oqartussanut imaluunniit kommunimut nassiunneqassaaq. Pilersitsinermi isumaqatigiissut, pilersitsisunit tamanit atsiorneqarsimasooq aammalu piginneqatigiilluni inissiatillit peqatigiiffiata malittarisassai qinnuteqaammut ilanngunneqassapput.

**§ 33.** Namminersornerullutik Oqartussat aamma kommuni qinnuteqaammik tigusermik kingorna illuut attartortittakkanik inissartaqartoq misissussavaat aammalu teknikkikkut aningaasaqarnikkullu naliliissummik suliaqassallutik, taamatuttaarlu piginneqatigiilluni inissiatillit peqatigiiffiat siunnersortimik sanaartornermik ilisimasalimmik, illuutip qanoq issusianik nalunaarusiortussamik atorfinitsitsissaaq.

*Imm. 2.* Teknikikkut aningaasaqarnikkullu naliliissut aamma qanoq issutsimik nalunaarusiaq ataatsimoorlutik Naalakkersuisut imaluunniit kommunalbestyrelsip pisinissamik neqeroorusiornerannut tungaviliissaaq, taannalu pissutissaqanngitsumik kinguarsaanertaqanngitsumik piginneqatigiilluni inissiatillit peqatigiiffiannut nassiunneqassaaq.

*Imm. 3.* Pisinissamut neqeroorut illuummi attartortittakkanik inissartaqartumi qularnaveeqqusiissutinut nalunaarsorsimasunut pisinnaatitaaffusinnaasut piginnittumullu immikkut piumasaqaataasimasinnaasut pillugit paasissutissanik imaqaassaaq. Pisinissamut neqeroorut piginneqatigiilluni inissiatillit peqatigiiffiata illuut attartortittakkanik inissartaqartoq qularnaveeqqusiullugu taarsigassarsianik sapinngisamik annertunerpaanik tiguserinnaanut atugassarititaasunik imaqaarsinnaavoq.

**§ 34.** Sanaartornermik ilisimasalik sanaartornermi nakkutilliinermik aamma sanaartornermi pilersaarusiornermik misilittagaqassaaq, aammalu illuummut immikkut ittumik attuumassuteqartussaanani. Sanaartornermik ilisimasalik inuussutissarsiornermi akisussaanermut sillimmasersimassaaq.

*Imm. 2.* Piginneqatigiilluni inissiaatillit peqatigiiffiat aningaasalersuineri siunnersortimik, illuutip attartortittakkanik inissiaartaqartup tигuneranut atatillugu piginneqatigiilluni inissiaatillit peqatigiiffianut ikiuuttussamik atorfnitsitsissaaq.

**§ 35.** Attartortoq inissiamik attartortittakkamik piginneqatigiilluni inissiaatitut tigusinissamik kissaateqanngitsaq:

1) Inissiami attartukkamini najugaqaannarsinnaavoq.

2) Illoqarfimmi najukkamini inissianik attartortitsisarneq pillugu Inatsisartut peqqussutaanni atuuttumi tamanna periarfissaqartinneqarpas, inissiamik attartortittakkamik allamik neqeroorfigineqarnissamut Naalakkersuisunut imaluunniit kommunalbestyrelsimut qinnuteqarsinnaavoq.

*Imm. 2.* Inissiani, attartortunit inissianik attartukkaminnik piginneqatigiilluni inissiatut tигuserusunngitsunit najugaqarfigineqartuni, piginneqatigiilluni inissiaatillit peqatigiiffiata atuisinnaatitaaffigisaanni Namminersornerullutik Oqartussat imaluunniit kommuni pigineqataasutut inississapput. Piginneqatigiilluni inissiaatillit peqatigiiffiata Namminersornerullutik Oqartussat imaluunniit kommuni inissianut atuisinnaatitaaffigiligaannut ineqarnermut akitsuummik akiliisissavai.

*Imm. 3.* Attartortup illuummi najugaqaannartup ineqarnermut akiliutissaa, inissianik attartortitsisarneq pillugu Inatsisartut peqqussutaanni sukkulluunniit atuuttumi Namminersornerullutik Oqartussat kommunillu inissiaataanni attartortittakkani ineqarnermut akiliutip naatsorsorneqartarneranut maleruagassat nalinginnaasut naapertorlugit naatsorsorneqassaaq.

*Imm. 4.* Piginneqatigiilluni inissiaatillit peqatigiiffiata maleruagassiaani aalajangersimasuni aalajangersakkat, tassunga ilaallutik torersaarnissamut maleruagassat malineqarnissaat, attartortumut illuummi attartortuuginnartumut atuuttussaapput.

**§ 36.** Attartortup inissiamik attartukkaminik piginneqatigiilluni inissiatut tigusinissamik kissaateqanngitsup, aammalu illuummi attartortuuginnartup sukkulluunniit inissiaq attartukkani piginneqatigiilluni inissiatut tigusinnaavaa. Piginneqatigiilluni inissiaatillit peqatigiiffiat pigineqataassutit tunniunneqarnissaanut akerliussinnaangilaq.

**§ 37.** Attartortup inissiamik allamik attartornissamut neqeroorut akuerippagu, Naalakkersuisut imaluunniit kommunalbestyrelsi attartortumut inissiamik, attartortup inoqutaanut naapertuuttumik neqerooruteqassapput. Attartortup nuunneranut aningaasartuutit naleqquttumik annertussuseqartut Namminersornerullutik Oqartussanit imaluunniit kommunimit akilerneqassapput.

*Imm. 2.* Attartortup inissiaq attartukkani qimappagu, Namminersornerullutik Oqartussat imaluunniit kommunip inissiaq pigisartik piginneqatigiilluni inissiaatillit peqatigiiffianni utaqquisut allattorsimaffianni allatsissimasumut, inissianik attartortitsisarneq pillugu Inatsisartut peqqussutaanni sukkulluunniit atuuttumi inoqutigiinnut inissiallu annertussusissaannut tunngatillugu aalajangersakkanik naammassinissimasumut siullermut tunniutissavaat. Tamatuma peqatigisaanik inuk utaqquisut allattorsimaffianniittooq pisortat inissiaataannik attartortittakkamik utertitaqassaaq. Utqqisut allattorsimaffianni allatsissimasut arlaannaataluunniit pigineqataassummik tigusinissamut piumasaqaatinik naammassinissimanngippat, Naalakkersuisut imaluunniit kommunalbestyrelsi innersuussisinnaatitaallissaaq.

**§ 38.** Piginneqatigiilluni inissiatillit peqatigiiffiata pilersinneqarnermi kingunitsianngua inuit, piginneqatigiilluni inissiatillit peqatigiiffianni ilaasortanngorusuttut allattorsimaffiannik pilersitsissaaq. *Imm.* 2. Namminersornerullutik Oqartussat imaluunniit kommunip piginneqataassutaa inummut, piginneqatigiilluni inissiatillit peqatigiiffiata utaqqisunut allattorsimaffianni allatsissimasumut tunniunneqassaaq.

**§ 39.** Namminersornerullutik Oqartussat imaluunniit kommuni piginneqatigiilluni inissiatillit peqatigiiffiata pisortat inissiaataannik attartortittakkanik piginneqatigiilluni inissiatut tigusineranut atatillugu, pisinermut akiusup tamakkiisup 50%-ianut erniaqanngitsunik akilersugassaannngitsunillu taarsigassarsititsisinnaapput. Illuutip piginnittaa taakkununga 50%-inik taarsigassarsititsisusaaq. *Imm.* 2. Taarsigassarsiarititassat aatsaat tunniunneqarsinnaapput piginneqataasut ataasiakkaat, inissiap piginneqataasup atuisinnaatitaaffigisassaata pisiarineranut akigititaasup tamakkiisup 5%-ia namminneerluni akilerpagu.

*Imm.* 3. Pisinermut akiusumit tamakkiisumit sinneruttut piginneqatigiilluni inissiatillit peqatigiiffiata nammineerluni aningaasalersussavai.

**§ 40.** Qanoq issutsimut nalunaarusiamut naapertuuttumik, pisortat illuutaannut attartortittakkanik inissartaqartumut pisinermut akigititassaq teknikkikkut aningaasaqarnikkullu nalinganut, tassaasumut illuutip pisiareqqinneranut akigititassaq nalikilliliinerit aserfallatsaaliorneqanngitsullu ilanngaatilgalugit, aalajangerneqassaaq. Tassunga tigusineranut atatillugu aningaasartuutitut matussutissatut 2%-it ilanngunneqassapput, taakkununga ilaallutik teknikkikkut aningaasaqarnikkullu siunnersorteqarnermut, inatsisilerituumik siunnersorteqarnermut, aningaasalersuineri siunnersorteqarnermut, allaffissornermut, aningaasalersuineri, piginnittuunermut uppersaartip aamma qularnaveeqqusiussaqarluni taarsigassarsineri allagartat suliarineqarnerinut kiisalu naqissusiineri uppersaartinut aningaasartuutit.

*Imm.* 2. Illuut tigusinerup nalaani aserfallatsaaliqarsimanngippat, aserfallatsaaliinerup aallarteqqinnissaanut aningaasartuutissanut matussutissanik piginneqatigiilluni inissiatillit peqatigiiffiat taarsigassarsisinnaavoq. Taarsigassarsiat akilersorneqatussanik tulleriinnilersuineri Namminersornerullutik Oqartussanut aamma kommunimut taarsigassarsianit sallinnortillugit inissinneqassapput.

*Imm.* 3. Najugaqarfimmi ataatsimi illuummi inissianilu ataasiakkaani sillimmatissatut illuartitat ileqqaakkat illuutip attartortitsiviusartup tigusineri piginneqatigiilluni inissiatillit peqatigiiffiannut nakkartinneqassanngillat.

**§ 41.** Illuut attartortittakkanik inissartaqartoq nutaaq naammassineqarnerminiit atorineqalernerminiillu ukiup ataatsip iluani tiguneqassappat, pisinermut akiusoq sanaartornermut naatsorsuutit akuerisat tunngavilgalugit aalajangerneqassaaq, akigititassamullu tigusineri atatillugu aningaasartuutitut matussutissatut 2%-it ilanngunneqassapput, taakkununga ilaallutik teknikkikkut aningaasaqarnikkullu siunnersorteqarnermut, inatsisilerituumik siunnersorteqarnermut, aningaasalersuineri siunnersorteqarnermut, allaffissornermut, aningaasalersuineri, piginnittuunermut uppersaartip aamma qularnaveeqqusiussaqarluni taarsigassarsineri allagartat suliarineqarnerinut kiisalu naqissusiineri uppersaartinut aningaasartuutit.

*Imm.* 2. Najugaqarfimmi ataatsimi illuummi inissianilu ataasiakkaani sillimmatissatut illuartitat ileqqaakkat illuutip tigusineri piginneqatigiilluni inissiatillit peqatigiiffiannut nakkartinneqassapput.

*Imm.* 3. § 33 teknikkikkut aningaasaqarnikkullu naliliisarnermut tunngasoq atorineqassanngilaq.

**§ 42.** Pissutsit immikkut tamatumunga tunngavissaqartitsippata illuutip attartortittakkanik inissartaqartup §§ 40 aamma 41 naapertorlugit akigititassatut aalajangersarneqartunit akikinnerusumik tiguneqarsinnaanera Naalakkersuisut aalajangersinnaavaat. Pisinissamut akigititassaq illuutip niuernermi nalinganit qaffasinnerulersinneqarsinnaanngilaq.

**§ 43.** Namminersornerullutik Oqartussat imaluunniit kommuni piginneqatigiilluni inissiaatillit peqatigiiffiata illuummik attartortittakkanik inissartaqartumik tiguseranarut atatillugu innaallagissamut, imermut kiassarnermullu immikkut atuinnermut naatsorsuinnermullu uuttusersuinnissaq piginneqatigiilluni inissiaatillit peqatigiiffiannut isumaqatigiissutigisinnaavaat. Uuttusersuinnermut aningaasartuutit pisinnermut akiumut ilassutigittinneqassapput.

**§ 44.** Illuut attartortittakkanik inissartaqartoq, ungasianiit kiassarneqartoq imaluunniit pilersuinnermut attaveqaatinut, kuuffeqarfinnut atortulersuutinulluunniit allanut attaviligaasoq tiguneqarpat, piginneqatigiilluni inissiaatillit peqatigiiffiata tigusermi kingorna pilersuiffioreersut ingerlatiinnassavai. Piginneqatigiilluni inissiaatillit peqatigiiffiat pilersuisorlu tamanna pillugu isumaqatigiissusiussapput. Isumaqatigiissut Kalaallit Nunaanni Eqqartuussivimmi illuutitut nalunaarsuiffimmut nalunaarsorneqassaaq.

**§ 45.** Namminersornerullutik Oqartussat imaluunniit kommunip tigusermut atatillugu aningaasartuutit akilissavaat. Assersuutigalugu siunnersorteqarnermut, allaffissornermut, piginnittuinnermut uppersarsaatip suliarineqarneranut kiisalu naqissusiinnermut uppersarsaatinut aningaasartuutit.

**§ 46.** Namminersornerullutik Oqartussat imaluunniit kommunip taarsigassarsiarititaat piginneqatigiilluni inissiaatillit peqatigiiffiata illuutaata qularnaveeqqusiunneratigut qularnaarneqassapput. Taarsigassarsiat, illuut qularnaveeqqusiullugu pisinnermi akiusup sinneranarut aningaasalersuutissatut taarsigassarsiaritit akilererinnerini akilerneqartussatut inissisimassapput, tak. § 39, imm. 3.

**§ 47.** Namminersornerullutik Oqartussat imaluunniit kommunip piginneqatigiilluni inissiaatillit peqatigiiffiata illuummik attartortittakkanik inissartaqartumik tiguseranarut atatillugu, atugassarititaasut sukumiinnerusumik isumaqatigiissutaareersut tunngavigalugit piginneqatigiilluni inissiaatillit peqatigiiffiannit ininik attartornissamut pisinnaatitaaffeqarnissani piumasarisinnaavaat. Taamatuttaaq tigusermi attartortut allaluunniit illuummut tunngatillugu atuisinnaatitaasut, tassunga ilaallutik inuussutissarsiutinik ingerlatsinissamik pisinnaatitaaffeqartut, tigusermi pisinnaatitaaffeqarnerisa atuutiinnarnissaat piumasarineqarsinnaavoq.

## **Kapitali 6**

### *Piginneqatigiilluni inissiaatillit peqatigiiffiat*

**§ 48.** Piginneqatigiilluni inissiaatillit peqatigiiffiannut ilaasortaq ataaseq inissiamut ataasiinnarmut atuisinnaatitaalersinnaavoq.

*Imm. 2.* Piginneqataasut ataaseq inummit ataasiinnarmut pigineqarsinnaavoq.

*Imm. 3.* Inuinnaat aamma inuit namminersorsinnaatitaasut kisimik piginneqatigiilluni inissiaatillit peqatigiiffiannut ilaasortasinnaapput.

*Imm. 4.* Namminersornerullutik Oqartussat imaluunniit kommuni, imaluunniit sanatitsisoq namminersortoq piginneqatigiilluni inissiaatillit peqatigiiffianni piginneqataasutut inissisimappata, imm. 1 aamma 3 atutissanngillat.

**§ 49.** Piginneqataasut piginneqataassutsit aggorlugit annertussusilerneqarnerat naapertorlugu piginneqatigiilluni inissiaatillit peqatigiiffiata pisuussutaanarut piginneqataapput, taannalu

piginneqatigiilluni inissiaatillit peqatigiiffianni inigisap angissusaanut tamakkiisumut naleqqiullugu inissiani piginneqataaffiusuni ataasiakkaani inigisap angissusaa naapertorlugu naatsorsorneqartarpoq. *Imm.* 2. Kingusinnerpaamik atuilernermi ataatsimeersuartut piginneqataassutsinut naligitinneqartut naleqqussarsinnaavaat.

*Imm.* 3. Piginneqataasut piginneqatigiilluni inissiaatillit peqatigiiffiata pisuussutaanit piginneqataassutaat qularnaveeqqusiissutaasinnaanatillu eqqartuussisutigoortitsissutigineqarsinnaanngillat.

*Imm.* 4. Piginneqataasooq taamaallaat tunisinermi ilanngaattissat peereerlugit iluanaarutigisinnaasaminik tiguisinnaatitaasussamik piginnaatitsisinnaavoq. Tiguisinnaatitaasup piginneqataassutip tunineqarnissaa piumasarisinnaanngilaa. Tiguisinnaatitaasooq piginneqatigiilluni inissiaatillit peqatigiiffiani siulersuisuni nalunaarsorneqassaaq.

**§ 50.** Piginneqataasooq taamaallaat pisussaaffinnut piginneqatigiilluni inissiaatillit peqatigiiffiannut attuumassuteqartunut aallaqqaattissatut akiliutigisimasami nalinginut akiliisussaataasinnaavoq, taamaattorli tak. *imm.* 2.

*Imm.* 2. Ataatsimeersuartut aalajangerpata, peqatigiiffiup illuutaanut illuut qularnaveeqqusiullugu taarsigassarsisoqassasooq, ilaasortat namminneerlutik nammaqatigiillutillu akiitsunut akiliisussaatinneqassapput, tamanna taarsigassarsititsisup allakkatigut piumasarisimappagu.

*Imm.* 3. Piginneqataasooq taassumaluunniit qimatai *imm.* 1 aamma 2 naapertorlugit akiliisussaataapput, piginneqatigiilluni inissiap tassanilu akiitsunut pisussaaffit piginneqataasumit nutaamit tiguneqarnissaasa tungaanut.

**§ 51.** Piginneqatigiilluni inissiaatillit peqatigiiffianni oqartussaasuni qullersaasut tassaapput ataatsimeersuartut. Ataatsimeersuarnermi piginneqataasut tamarmik immikkut ataatsimik taasisinnaatitaapput. Inatsisartut peqqussutaanni matumani, piginneqatigiilluni inissiaatillit peqatigiiffianni malittarisassat imaluunniit peqatigiiffeqarnermut inatsisini maleruagassani nalinginnaasuni allanik aalajangiisoqarsimanngippat, ataatsimeersuarnermi aalajangiinerit nalinginnaasumik taasisut amerlanerussuteqarnerisigut akuersissutigineqartarput. Ataatsimeersuarnermi taasisinnaatitaasooq tassaavoq piginneqataanermut uppersaammik ateq allassimasooq.

*Imm.* 2. Ukiumoortumik ineqarnermut akitsuut, pigineqataasunut ataasiakkaanut akilersinneqartussaq ataatsimeersuarnermi aalajangersarneqartarpoq.

*Imm.* 3. Piginneqatigiilluni inissiaatillit peqatigiiffianni malittarisassat minnerpaamik malittarisassanik nalinginnaasunik, tak. ilanngussaq 1, ataatsimeersuarnermi taasisarnermut maleruagassanik, piginneqataassutini tunniussisarnermut maleruagassanik aamma piginneqatigiilluni inissiaatillit peqatigiiffianik atorunnaarsitsinissamut maleruagassanik imaqartunik imaqassapput.

**§ 52.** Ataatsimeersuartut siulersuisunik immaqalu aqutsisumik, ulluinnarni aqutsinermik isumaginnittuusussanik qinersissapput. Ataatsimeersuarnermi aqutsisumik toqqaasoqanngippat, siulersuisut piginneqatigiilluni inissiaatillit peqatigiiffiata ulluinnarni aqunneqarnerannik isumaginnittuusapput. Peqatigiiffimmi ilaasortat kisimik siulersuisunut qinigaasinnaassuseqarput.

*Imm.* 2. Piginneqatigiilluni inissiaatillit peqatigiiffiata ulluinnarni aqunneqarnera siulersuisunit isumagineqarpat, piginneqatigiilluni inissiaatillit siulersuisunut ilaasortat piginneqatigiilluni inissiaatillit peqatigiiffiannut aningaasaqarnikkut akisussaaffinut isumannaallisaatitut siulersuisut akisussaaneritut sillimmasiissapput.

**§ 53.** Peqatigiiffik piginneqataanermut uppersaammik, piginneqataasup aqqanik allassimasumik tunniussisaaq.

*Imm. 2.* Piginneqataanermut uppersarsaat tammarpat nutaamik sanasoqassaaq, tassanilu taassuma tammartumut taartanera allasimassaaq.

**§ 54.** Piginneqatigiilluni inissiaq inuussutissarsiornermut atorineqassanngilaq, taamaattorli takukkit imm. 2 aamma § 47.

*Imm. 2.* Inuussutissarsiutinik ingerlataqarneq illup sullitanit ornigarneqarneranik kinguneqassanngippat, tamannalu najugaqarfittut atuinermit naleqqiullugu annertuallaassanngippat, ataatsimeersuartut piginneqatigiilluni inissiap ilaata inuussutissarsiornermut atorineqarsinnaanera akuerisinnaavaat.

## Kapitali 7

### *Sillimmasiisarneq, aserfallatsaaliuineq allanngortitsisarnerlu*

**§ 55.** Piginneqatigiilluni inissiatillit peqatigiiffiata illuutaa sukkulluunniit ikuallattoornissamut anorersuarneranilu ajoqusernissamut sillimmaserneqarsimassaaq.

**§ 56.** Piginneqatigiilluni inissiatillit peqatigiiffiata illuutaa inissiallu ataasiakkaat naammaginnartumik aserfallatsalineqassapput. Aserfallatsaaliuineq sanasut suliaattut pitsaassuseqarlutik eqqortumik suliarineqassapput. Piginneqatigiilluni inissiatillit peqatigiiffiat ilanngussaq 2 aallaavigalugu inissiatimini aserfallatsaaliuinissamut innersuussusiussaaq.

*Imm. 2.* Illup iluani pisattanik aalaakkaasunik aserfallatsaaliuineq piginneqataasut ataasiakkaat isumagisassaraat, namminnerlutillu akiligassaralugu. Piginneqatigiilluni inissiami allanik aserfallatsaaliuineq piginneqatigiilluni inissiatillit peqatigiiffiata isumagisassaraa, taassumalu akiligassaralugu, taamaattorli tak. imm. 3.

*Imm. 3.* Ataatsimeersuartut illup iluani silataanilu aserfallatsaaliuinissamut maleruagassanik, piginneqataasut ataasiakkaat ataqqissallugit naammassissallugillu pisussaaffigisaannik akuersisinnaapput.

*Imm. 4.* Siulersuisut pilersaarutaasumik ataavartumillu aserfallatsaaliuinissamut pilersaarusiussapput, aammalu piginneqataasut ataasiakkaat ineqarnermut akitsuut aqutigalugu pilersaarutaasumik ataavartumillu aserfallatsaaliuinissamut akiliisineqassapput.

**§ 57.** Namminersornerullutik Oqartussat aamma kommuni piginneqatigiilluni inissiatillit peqatigiiffiata illuutaanik qularnaveeqqusiiffigineqarsimappata, aammalu piginneqatigiilluni inissiatillit peqatigiiffiata illuutaa inissiallu ataasiakkaat naammaginnartumik aserfallatsalineqanngipata, Namminersornerullutik Oqartussat aamma kommunip taarsigassarsiat atorunnaarsissinnaavaat, tak. § 82, imm. 1, nr. 4, imaluunniit piginneqatigiilluni inissiatillit peqatigiiffiat piffissap naleqquttup, sukumiinerusumik aalajangerneqartup iluani aserfallatsaaliuinissamik allakkatigut peqqusinnaallugu.

*Imm. 2.* Piginneqatigiilluni inissiatillit peqatigiiffiat Namminersornerullutik Oqartussanit imaluunniit kommunimit pingasoriarluni allakkatigut peqquneqarsimagaluarluni aserfallatsaaliuisimannngippat, Namminersornerullutik Oqartussat imaluunniit kommuip aserfallatsaaliugassat piginneqatigiilluni inissiatillit peqatigiiffiata akiligaanik suliaritissinnaavaat. Piumasaqaat piginneqatigiilluni inissiatillit peqatigiiffiata siulittaasuata najukkamut allakkatigut tigusiiffigisartagaanut allakkatut nalinginnaasutut tammatasaalisatullu nassiuuneqassaaq.

**§ 58.** Piginneqataasup illup iluani aserfallatsaaliuisussaataitanini sumiginnarpagu, siulersuisut piginneqataasooq allakkatigut piffissap naleqquttup, sukumiinerusumik aalajangerneqartup iluani aserfallatsaaliuinissamik peqqussavaat. Piffissaliussap naanerata kingorna siulersuisut aserfallatsaaliuinissaq suliarineqarsimanersoq paasiniallugu inissiaq takuniassallugu pisinnaatitaapput.

*Imm. 2.* Piginneqataasooq siulersuisunit pingasoriarluni allakkatigut peqquneqarsimagaluarluni

aserfallatsaaliuisimanngippat, siulersuisut piginneqataasup akiligaanik piginneqatigiilluni inissiaatillit peqatigiiffiat aserfallatsaaliugassanik isumaginnitsissinnaavaat. Taamaattorli piginneqataasup ilaasortaajunnaarsinneqarnissaa ataatsimeersuartunit aalajangerneqarpat tamanna pissanngilaq, tak. § 79, imm. 2.

**§ 59.** Piginneqataasooq inissiap iluani nalinginnaasunik annikinnerusunillu allannguissamut pisinnaatitaaffeqarpoq. Inissiap iluani annertuunik allannguisoqassappat, tamanna siulersuisunit akuerineqassaaq. Illup silataani annertuunik allannguisoqassappat, tamanna ataatsimeersuartunit akuerineqassaaq.

*Imm. 2.* Illup silataani allannguinerit sanasut suliaattut pitsaassuseqarlutik naammaginantumik aammalu sanaartornermut pilersaarusionermullu inatsisit naapertorlugit suliarineqassapput.

**§ 60.** Namminersornerullutik Oqartussat aamma kommunip qularnaveeqqutaat akilerneqartussanik tulleriinnilersuinermit pilersaarutaasumik ataavartumik aserfallatsaaliuinissamut taarsigassarsianit, pitsannguissamut taarsigassarsianit imaluunniit piginneqatigiilluni inissiaatillit peqatigiiffiata illuutaani allanngortiterinissamut taarsigassarsianit kingusinnerusumut inissinneqarsinnaapput. Namminersornerullutik Oqartussat imaluunniit kommunip qularnaveeqqutaasa kingusinnerusumut inissinneqarnissaannut qularnaveeqqusiiffusut kingornani inissisimasut taamatuttaaq kingusinnerusumut inissinneqarnissaminnik akuersinissaat piumasarineqarpoq.

*Imm. 2.* Namminersornerullutik Oqartussat aamma kommunip qularnaveeqqutaat piginneqatigiilluni inissiaatillit peqatigiiffiata aserfallatsaaliuisimannginnerup iluarsineqarnissaanut taarsigassarsiaanit kingusinnerusumut inissinneqarsinnaanngilaq.

*Imm. 3.* Namminersornerullutik Oqartussat imaluunniit kommunip qularnaveeqqutaat, piginneqatigiilluni inissiaatillit peqatigiiffiata taarsigassarsiaasa siornani inissisimasut, allanngortinneqarneranni, akilerneqartussanik tulleriinnilersuinermit kingusinnerusumut inissinneqassapput, tamatumuuna taarsigassarsiat nutaat piffissaq akilersorneqarfissaat sivitsorneqanngippat imaluunniit iluanaarutit tunniunneqarnerinut atatillugu taarsigassarsiat nutaat annertussusaat annertunerulinngippat.

## Kapitali 8

*Najugaqartussaataitaneq, attartortitsineq aamma inigisamik allamut attartortitsinissamik akuersisarneq*

**§ 61.** Piginneqataasup inissiami atuisinnaatitaaffigisamini najugaqarnissani pisussaaffigaa.

Piginneqataasooq imaluunniit inuk, piginneqataasup inoqutaanut ilaasooq, ukiup ataatsip iluani sivikinnerpaamik qaammatini arfinilinni ataannartuni unnuisarpap, najugaqartussaataitaneq naammassineqarsimassaaq.

**§ 62.** Siulersuisut piginneqataasooq piginneqatigiilluni inissiami inimik ataatsimik inuinnarnut namminersorsinnaatitaasunut attartortitsinissaa akuerisinnaavaat. Namminersorsinnaatitaanngitsunut imaluunniit inatsisitigut pisinnaatitaasunut pisussaataitaasunullu attartortitsisoqarsinnaanngilaq, aammalu ininik ataasiakkaanik qaammatinit pingasunit sivikinnerusumik attartortitsinissaaq pisinnaanngilaq.

*Imm. 2.* Ininik ataasiakkaanik attartortitsinermi attartornermut akiliutip annertussusissaa aammalu attartortitsinissamut isumaqatigiisummi atugassarititaasut siulersuisunit akuerineqassapput.

Attartornermut akiliut annerpaamik ineqarnermut akitsuummumut naleqqiullugu, naatsorsornerani piginneqatigiilluni inissiap annertussusaanut kvadratmeterit tamarmiusut inip annertussusaanut kvadratmeterinut tamarmiusunut agguarlugu naapertuuttumik annertussuseqassaaq.

*Imm. 3.* Attartortup ineqarnermut akiliut piginneqataasumut toqqaannartumik akilertassavaa.

*Imm. 4.* Piginneqatigiilluni inissiaatillit peqatigiiffiannut tunngatillugu attartortup iliuusai piginneqataasumut attartortitsisumut toqqaannartumik nuunneqarsinnaapput.

**§ 63.** Siulersuisut piginneqataasup piginneqatigiilluni inissiamik inigisaminik inunnut namminersorsinnaatitaasunut attartortitsinissaa akuerisinnaavaat, piginneqataasoq peqanngikkallartussaappat, aammalu peqanngikkallarnissaa assersuutigalugu napparsimanermik, ilinniagaqarnermik, pinerluuteqarsimasunik inissiisarfimmiinnermik, imaluunniit piginneqataasup nammineerluni imaluunniit inoqutigiinni ilaasup nuutsikkallarneqarsimaneranik pissuteqarpat. Qaammatinit pingasunit sivikinnerusumik inigisamik allamut attartortitsisoqarsinnaanngilaq, taamatullu inunnut namminersorsinaatitaangitsunut aammalu inatsisitigut pisinnaatitaasunut pisussaataitaasunullu attartortitsisoqarsinnaanani.

*Imm. 2.* Piginneqatigiilluni inissiaatip sivilunerpaamik ukiuni pingasuni inummut allamut attartortinneqarnissaanut piginneqatigiilluni inissiaatillit siulersuisui akuersisinnaapput.

**§ 64.** Piginneqatigiilluni inissiaatip inummut allamut attartortinneqarnerani, attartornermut akiliutissap annertussusissaa, inissiallu inummit allamut attartorneqarneranut atugassarititaasut siulersuisunit akuerineqartussaapput. Attartornermut akiliut annerpaamik ineqarnermut akitsuutip annertoqatigissavaa. Pequtit inummut allamut attartortitsinermi isumaqatigiissummut ilaatinneqarpata, attartornermut akiliut annerutinneqarsinnaavoq, taamaattorli akiliut annertunerpaamik ineqarnermut akitsuut 10%-imik ilallugu annertussuseqarsinnaalluni. Inigisamik attartortoq ineqarnermut akiliummik piginneqataasumut toqqaannartumik akiliisassaaq.

*Imm. 2.* Inigisamik allamut attartortitsiniarluni isumaqatigiissuteqarnermi, inigisamik attartortinneqartup piginneqatigiilluni inissiaatillit peqatigiiffiannut, piginneqataasumut inummulluunniit allamut allanik isumaqatigiissuteqarnissaa piumasarineqarsinnaanngilaq. Taamatut isumaqatigiissuteqartoqarsinappat taakkua atuutissanngillat. Inigisamik allamut attartortitsinissamik isumaqatigiissut atuutiinnassaaq, kisiannili piumasaqaataasut ilanngunneqartut atuutissanatik. Tamatumanili attartortinneqartup inissiaq iserterfigineratut annertunerpaatigut pitsaassuseqartillugu utertissagaa isumaqatigiissutigineqarsinnaavoq.

*Imm. 3.* Inigisamik allamut attartortitsiniarluni isumaqatigiissut inummut ataatsimut tunngasuuvog, aammalu attartortinneqartup siulersuisunit akuerineqarluni akuerineqaraniluunniit piginneqatigiilluni inissiaq attartukkani allamut attartorteqqissinnaanngilaa atortissinnaanaguluunniit.

**§ 65.** Namminersornerullutik Oqartussat imaluunniit kommuni piginneqatigiilluni inissiaatillit peqatigiiffiannut ilaasortanngorsimagunik, Namminersornerullutik Oqartussat imaluunniit kommunip attartortitsineq pioreersoq allanngortinnagu ingerlatiinnassallugu pisinnaatitaaffigaat.

**§ 66.** Attartortitsinissap inigisamilluunniit allamut attartortitsinissap isumaqatigiissutigineqarnerani, piginneqataasup attartortussaq imaluunniit inigisamik attartortinneqartussaq pisinnaatitaaffisa annikillisinneqarsinnaanerat pillugu allakkatigut ilisimatissavaa, tak. § 81, imm. 1. Namminersornerullutik Oqartussat imaluunniit kommuni piginneqatigiilluni inissiaatillit peqatigiiffiannut ilaasortanngorsinappat, inissiap attartortittakkaq piginneqatigiilluni inissiaatillit peqatigiiffiannut tunniunneqarnerata nalaani, attartortoq tamanna pillugu allakkatigut ilisimatinneqassaaq.

*Imm. 2.* Allakkatigut ilisimatitsisoqarsimanngippat taarsiisussanngortitsisoqassaaq. Attartortup inigisamilu allamut attartortitsisup annaasai eqqartuussivitsigut taarsiisussanngortitsisarnermut maleruagassat nalinginnaasut malillugit naatsorsorneqassapput.



## Kapitali 9

### *Piginneqataassutiniq tunniussineq*

**§ 67.** Piginneqataasup piginneqataassutimi piginneqataalersussamut nutaamut tunniunneqarnissaa pillugu piginneqatigiilluni inissiaatillit peqatigiiffianni siulersuisut qinnuigisinnaavai, tak. § 77, imm. 1.

*Imm. 2.* Piginneqataasup piginneqataassutimi, tassungalu atatillugu pisinnaatitaaffimmi pisussaaffimmilu piginneqataalersussamut nutaamut tunniunneqarnissaasa tungaanut piginneqatigiilluni inissiaatillit peqatigiiffianni ilaasortaaginnassaaq.

*Imm. 3.* Siulersuisut tunniussinissamik suliamik aallartitsinnginnerminni inissiaq aappariinnit atorneqarsimappat, piginneqataasup qinnuteqaataa aappaasumit atsiorneqarsimanersoq siulersuisunit qulakkeerneqassaaq.

**§ 68.** Piginneqataassummik tunniussinermi piginneqataassutip akia ukunannga qaffasinnerussanngilaq:

1) Piginneqataasup aallaqqaatissatut akiliutai.

2) Piginneqataasup piginneqatigiilluni inissiaatit pigisarilernerannut atatillugu piginneqatigiilluni inissiaatillit peqatigiiffiata taarsigassarsiaanut akiliutigisimasai.

3) Piginneqatigiilluni inissiaammi pitsanngorsaait nalingi.

4) Piginneqatigiilluni inissiaatip illuutillu aserfallatsaaliorneqannginnerata nalinga.

5) Piginneqataasup piginneqatigiilluni inissiaatillit peqatigiiffianni ingerlatsinermi sinneqartoorutitut naatsorsorneqartunit aamma sillimmatissatut illuartitanit atorneqarsimanngitsunit pisassai.

*Imm. 2.* Imm. 1, nr. 1-imi aamma 2-mi aningaasartaliunneqartut ukiumoortumik januaarip ulluisa aallaqqaataanni erniap kisitsisitaanut 1,5%-imik ilallugu qaffanneqartarput. Aallaqqaatissatut akiliutit piffissami piginneqataassutip pisiarineqarfiani qaffanneqartarput, taamaattorli siusinnerpaamik atuilernissamut akuersissutip suliarineqarnerani ulluliunneqartoq aallarnerfigalugu. Akilersuutit piffissamit akilernerqarfissaanit qaffanneqartarput, taamaattorli siusinnerpaamik atuilernissamut akuersissutip suliarineqarnerani ulluliunneqartoq aallarnerfigalugu.

*Imm. 3.* Atuilernissamut akuersissutip suliarineqarnissaata tungaanut, piginneqataassut tunniunneqartoq piginneqataasup aallaqqaatissatut akiliutaata nalinganik akeqartinneqartarpoq.

**§ 69.** Pitsannguinerit inissiap nutaamik atorsinnaassuseqalersinneqarneranik imaluunniit atorneqarnerata nalingata qaffasinnerulersinneqarneranik paasineqassapput. Pisoqaassuseq aamma nungullarnerit pissutigalugit nalinga ajorseriaateqarsimappat taakku ilanngaatineqassapput.

*Imm. 2.* Pitsannguinerit tunniussinermut akiusumut ilaatinneqassappata, tamanna pitsannguinerit naammassineriniit kingusinnerpaamik qaammatit arfinillit qaangiunnerini siulersuisunit allakkatigut akuerineqarsimassaaq.

**§ 70.** Piginneqataasup toqunerani aappaasup qimataasup piginneqataassummik tigusinissamut aamma piginneqataasut ingerlaannarnissamik pisinnaatitaaffeqarpoq. Aappaasup piginneqataasut uppersaammik nammineq aterminik allassimasumik tunineqassaaq. Piginneqataassutip akia § 68 naapertorlugu akiusutut naatsorsorneqartumit qaffasinnerutinneqassanngilaq.

*Imm. 2.* Taamatuttaaq inuk piginneqataasup toqunnginnerani sivikinnerpaamik ukiuni marlunni piginneqataasumut inoqutaasup pisinnaatitaaffeqarpoq.

**§ 71.** Piginneqataasup illumut paaqqinnittarfirmut assigisaanulluunniit nuuppat, § 70-imi aalajangersakkat taamatuttaaq atorneqassapput.

*Imm. 2.* Siulersuisut tunngavissaqarluarunik tuniussinissamut akierlusinnaapput.

**§ 72.** Piginneqataasup averusernerani avinneraniluunniit, imaluunniit piginneqataasup aappaqarnerata atorunnaarsinneqarnerani aapparuiusuni arlaat piginneqataasutut ingerlaannarnissamut pisinnaatitaaffeqassanersoq, pisariaqassappat akuersissuteqarnikkut eqqartuussinikkulluunniit aalajangerneqassaaq. Tunniussineq pissappat, piginneqataassutip akia § 68 naapertorlugu akiusutut naatsorsorneqartumit qaffasinnerutinneqassanngilaq.

*Imm. 2.* Siulersuisut tunngavissaqarluarunik tuniussinissamut akerliussinnaapput.

**§ 73.** Piginneqataasup inooqateqarnerminik unitsitsinerani, inooqatigiinnerup unitsinneqarnissaa sioqqullugu piginneqatigiilluni inissiaammi minnerpaamik ukiuni marlunni ataatsimut najugaqarsimagunik piginneqataasup piginneqataassutini inooqatigisaminut tunniussinnaavaa. Piginneqataassutip akia § 68 naapertorlugu akiusutut naatsorsorneqartumit qaffasinnerutinneqassanngilaq.

*Imm. 2.* Siulersuisut tunngavissaqarluarunik tuniussinissamut akerliussinnaapput.

**§ 74.** Kingornussinikkut piginneqataassut inummut inissiami najugaqanngitsumut tunniunneqassappat, tunniussinissaq siulersuisunit akuerineqassaaq.

*Imm. 2.* Siulersuisut tunngavissaqarluarunik tuniussinissamut akerliussinnaapput. Taamatut pisoqartillugu siulersuisut tunisinermi iluanaarutit kingornussisumut akilissavaat. Piginneqataassutip akia § 68 naapertorlugu akiusutut naatsorsorneqartumit qaffasinnerutinneqassanngilaq.

**§ 75.** §§ 70-74-imi taaneqartunit allaanerusumik pisoqartillugu, piginneqataassutininik tunniussineq piginneqatigiilluni inissiaatillit peqatigiiffiata malittarisassaanni maleruagassiarineqartut naapertorlugit pisinnaavoq. Piginneqataassutip akia § 68 naapertorlugu akiusutut naatsorsorneqartumit qaffasinnerutinneqassanngilaq.

**§ 76.** Piginneqataasoq piginneqataassutimi tunniunneqarnissaa pillugu siulersuisunut qinnuteqarpat, piffissaq inissiamit nuuffissaq aamma piffissaq piginneqatigiilluni inissiaammik misissuiffissaq siulersuisut piginneqataasullu allakkatigut isumaqatigiissutigissavaat. Piginneqataasoq misissuinnermut peqataanissaminik pisinnaatitaaffeqarpoq, aammattaaq suliamik ilisimasalimmik ilaqlarluni.

*Imm. 2.* Misissuinnermi siulersuisut misissuinnermut nalunaarusiussapput, tassanilu amigaataasinnaasut sumiginnagaasimasinnaasulluunniit, siulersuisut piginneqataasup akisussaaffisut isumaqarfigisaat allanneqassapput. Piginneqataasoq tamatumunnga isumaqataanngippat, tamanna misissuinnermut nalunaarusiami allanneqassaaq, piginneqataasup isummersuutai nalunaarneqassallutik. Misissuinnermi illuatungeriit marluullutik peqataasimappata, misissuinnermut nalunaarusiaq misissuinnermut atatillugu illuatungeriinnit atsiorneqassaaq. Piginneqataasoq taassumaluunniit sinniisigisaa misissuinnerup kingunitsianngua nalunaarusiap assilineranik tunineqassaaq.

*Imm. 3.* Piginneqataasoq taassumaluunniit peqataanissamut piginnaatitaa misissuinnermut takkutinngippat, siulersuisut misissuinnermut nalunaarusiaq suliassanut, piginneqataasup akiligaanik suliarineqartussanut tunngavigissallugu pisinnaatitaaffeqarput.

*Imm. 4.* Suliassanut piginneqataasup akiligaanik suliarineqartussanut aningaasartuutit tunisinermi iluanaarutissanit matussuserneqassapput. Piginneqatigiilluni inissiaatillit peqatigiiffiata aningaasartuutai matussuserneqanngitsut piginneqataasumit inissiamit nuuttumit piginneqatigiilluni inissiaatillit peqatigiiffiannut akilerneqassapput.

**§ 77.** Siulersuisut piginneqataassummik tunisinermi allatullu iliorluni tunniussinermi ingerlatsisuusussaapput. Siulersuisut piginneqataassummik tunisinissamut allatullu iliorluni tunniussinissamut isumaqatigiissusiornissamut kisimiillutik piginnaatitaapput.

*Imm. 2.* Tunniussinissaq sioqqullugu siulersuisut piginneqataalersumut uku tunniutissavaat:

- 1) Piginneqatigiilluni inissiatillit peqatigiiffiata malittarisassai.
  - 2) Ukiumoortumik naatsorsuutit missingersuutillu kingulliit assilineri.
  - 3) Piginneqataassummik tunniussinnermi akiusup qanoq iliorluni naatsorsorneqarsimanerinit takussutissat immikkoortiterlugit allassimaffiat.
  - 4) Piginneqatigiilluni inissiat pillugit Inatsisartut peqqussutaat sukkulluunniit atuuttoq.
- Imm. 3.* Piginneqataassummut akiliutissaq piginneqatigiilluni inissiatillit peqatigiiffiannut akilernerqassaaq, tassanngaanniillu pisassaasinnaasut ilanngaatigereernerini sinneruttut piginneqataajunnaartumut akilernerqassapput.
- Imm. 4.* Piginneqataalersup piginneqataajunnaartumut allanik isumaqatigiissuteqarnissaa tunniussinnermi piumasarineqarsinnaanngilaq, tassanili pequtit aalaakkaasunngorlugit ikkussat, piginneqatigiilluni inissiaammut immikkut naleqqussarneqarsimasut ikkunneqarsimasulluunniit pineqanngillat.

## Kapitali 10

### *Ilaasortaajunnaarsitsineq*

**§ 78.** Siulersuisut pisussaapput piginneqataasooq ilaasortaajunnaarsissallugu atuisinnaatitaaneralu atorunnaarsissallugu, piginneqataasup:

- 1) Allakkatigut piumaffigineqarnerminiit kingusinnerpaamik ulluinnaat arfineq marluk qaangiunnerini akiligassani akilinngippagit.
- 2) Ineqarnermut akitsuutit akiligassalluunniit tassunga ilaasussat allat akilersimanngippagit, aammalu allakkatigut piumaffigineqarnerminiit kingusinnerpaamik ulluinnaat arfineq marluk qaangiunnerini akiligitsuukkani akilinngippagit.
- 3) Siulersuisut akuersiteqqaarnagit piginneqatigiilluni inissiat najukkani allamut attartortippagu, aammalu allakkatigut piumaffigineqarnerminiit kingusinnerpaamik ulluinnaat 14-it qaangiunnerini tamanna iluarsisimanngippagu.
- 4) Piginneqatigiilluni inissiat najukkani najugaqarfiginngippagu, aammalu allakkatigut piumaffigineqarnerminiit kingusinnerpaamik ulluinnaat 30-t qaangiunnerini tamanna iluarsisimanngippagu.
- 5) Aserfallatsaaliuinissamut maleruagassat allakkatigut piumaffigineqarnerminiit kingusinnerpaamik ulluinnaat 30-t qaangiunnerini malissimanngippagit.

**§ 79.** Piginneqataasup qaammatit aqqaneq marluk ataannartut iluanni siulersuisunit allakkatigut minnerpaamik pingasoriarluni piumaffigineqarsimagaluarluni, piginneqatigiilluni inissiatillit peqatigiiffiata torersaarnissamut maleruagassiaanik malinninnissamut pisussaaffini malinngippagit, piginneqataasooq ilaasortaajunnaarsissallugu atuisinnaatitaaneralu atorunnaarsissallugu ataatsimeersuartut pisussaapput.

*Imm. 2.* Piginneqataasooq siulersuisunit allakkatigut pingasoriarluni piumaffigineqarsimagaluarluni § 58 naapertorlugu inissiap iluani aserfallatsaaliuisimanngippat, tamannalu piginneqatigiilluni inissiatillit peqatigiiffiata illuutaanik ajoqusivinnermik nassataqarsinnaappat, ataatsimeersuartut piginneqataasooq ilaasortaajunnaarsissinnaavaat.

**§ 80.** §§ 78 aamma 79 naapertorlugit allakkatigut piumasaqaat allakkatut nalinginnaasutut aamma tamatsaalisatut piginneqataasup najukkamini allakkanik tigusisarfanut nassiunneqassaaq. Tamatuma saniatigut pisuni § 78, nr. 3-mi aamma 4-mi taaneqartuni, piumasaqaat piginneqatigiilluni inissiaammut piginneqataasup atuisinnaatitaaffigisaanut, siulersuisunut ilaasortanit marlunnit tunniunneqassaaq.

Piginneqataasooq pissarsiarineqarsinnaanngippat siulersuisunut ilaasortat allakkat piginneqatigiilluni inissiaammut, piginneqataasup atuisinnaatitaaffigisaanut tunniunneqarsimanera atsiormikkut uppersassavaat. Uppersaatip assiliner erngerluni piginneqatigiilluni inissiaatillit peqatigiiffanni siulittaasumut tunniunneqassaaq.

*Imm. 2.* Ataatsimeersuartut imaluunniit siulersuisut piginneqataasumik ilaasortaajunnaarsitsinermik aalajangererat allakkiatut suliarineqassaaq, tassungalu allakkatigut paasissutissat uku ilaatinneqassapput:

- 1) Ilaasortaajunnaarsitsinermut tunngavisoq, inatsisitigut tamatumunnga tunngavineqartoq allallugu.
- 2) Piginneqatigiilluni inissiaat qaqugu qimanneqarsimassanersoq pisattallu annisereersimassanersut.
- 3) Piginneqatigiilluni inissiaammut matuersaatit qaqugu siulersuisunut tunniunneqarsimassanersut.
- 4) Piginneqatigiilluni inissiaat qaqugu misissorneqassanersoq.
- 5) Piffissap qanoq ilinissaata tungaanut ineqarnermut akitsuut, kiassarneq il.il. akilersorneqassanersut.
- 6) Aningaasartuutit allat suut piginneqataasup piginneqatigiilluni inissiaatillit peqatigiiffannut taarsissanerai.

*Imm. 3.* § 78, nr. 1 aamma 2, aamma § 79 tunngavigalugit ilaasortaajunnaarsitsinermi, atuisinnaatitaaneq sivikinnerpaamik qaammammik ataatsimik sioqqutsilluni nalunaaruteqarnikkut atorunnaarsinneqarsinnaavoq. § 78, nr. 3-5 naapertorlugit ilaasortaajunnaarsitsinermi atuisinnaatitaaneq erniinnaartumik atuuttussanngorlugu atorunnaarsinneqarsinnaavoq.

*Imm. 4.* Imm. 2 naapertorlugu aalajangiinermik nalunaarut piumasaqaatip nassiunneqartarneratut nassiunneqassaaq, tak. imm. 1.

**§ 81.** Piginneqataasooq ilaasortaajunnaarsinneqarpat, tamatumunnga peqatigitillugu inissiamik piginneqataasummut attuumassuteqartumik attartortsinermut imaluunniit inigisamik allamut attartortsitsinermut isumaqatigiissut atorunnaassaaq. Attartortup imaluunniit inigisamik attartortinneqartup isumaqatigiissut unioqqutissimanngikkaluarpaguluunniit tamanna atuutissaaq.

*Imm. 2.* Piumasaqaatip naammassineqannginnerani piginneqataasooq piumasaqaammik, ilaasortaajunnaarsinneqarnissamik kinguneqartussamik tigusippat, aammalu piginneqataasup piumasaqaat naammassiniarnagu aalajangersimappat, piginneqataasup attartortoq imaluunniit inigisamik attartortinneqartoq ilaasortaajunnaarsinneqarnissaq pillugu nalunaarfigissavaa. Piumasaqaammik naammassininnissamut piffissarititaasup naaneraniit kingusinnerpaamik ulluinnaat tallimat qaangiunnerini ilisimatitsissut allakkatut nalinginnaasutut aamma tammatsaalisatut attartortup imaluunniit inigisamik attartortinneqartup najukkamini allakkanik tiguisarfanut nassiunneqassaaq.

## Kapitali 11

*Taarsigassarsiat erniaqanngitsut akilersugassaanngitsullu akiligassanngortinneqartarnerat*

**§ 82.** Naalakkersuisut imaluunniit kommunalbestyrelsi allamik aalajangigaqanngippata, pisortanit taarsigassarsiarititat erniaqanngitsut akilersugassaanngitsullu akiligassanngortinneqassapput, imatut pisoqartillugu:

- 1) Taarsigassarsitsinermi atugassarititaasut annertuumik sumiginarneqarpat.
- 2) Piginneqatigiilluni inissiaatillit peqatigiiffiata siulersuisui imaluunniit ataatsimeersuartut §§ 78 aamma 79 naapertorlugit piginneqataasumik ilaasortaajunnaarsitsinissamik pisussaaffimminnik naammassininngippata.
- 3) Pisortanit taarsigassarsiarititat saniatigut taarsigassarsiat allat, piginneqatigiilluni inissiaatillit

peqatigiiffiata illuutaa qularnaveeqqusiullugu qulakkeerneqarsimasut atorunnaarsinneqarlutik akiligassannngortinneqarpata.

4) Taarsigassarsiallip inissiaq naammaginantumik aserfallatsaalinngippagu, aammalu taarsigassarsititsisimasumut qularnaveeqqusiissut ajorseriarsinnaappat.

5) Piginneqatigiilluni inissiaatillit peqatigiiffiata illuutaa minnerpaamik ikuallattoornissamut anorersuarneranilu ajoqusernissamut sillimmaserneqarsimanngippat.

6) Piginneqatigiilluni inissiaatillit peqatigiiffiata inissiaatai § 54-imi piumasaqaatit unioqqutillugit atorneqarpata.

7) Piginneqatigiilluni inissiaatillit peqatigiiffiata taarsigassarsititsisimasooq taassumaluunniit aallartitaa illuummik takuniaanerani isernissaanut tunngavissaqanngitsumik itigartippagu.

8) Piginneqatigiilluni inissiaatillit peqatigiiffiata ukiumoortumik naatsorsuutitik kingumoortumik misissortinngippagit imaluunniit piginneqatigiilluni inissiaatillit peqatigiiffiata ukiumoortumik naatsorsuutit pisortanut taarsigassarsititsisimasunut nassiukkumanngippagit.

9) Piginneqatigiilluni inissiaatillit peqatigiiffiata naatsorsuusiornera naatsorsuusioriaatsimut nalinginnaasumut naleqqiullugu pissusiviusunut uppersarsarneqarsinnaasumik naleqqutinngippat.

10) Piginneqatigiilluni inissiaatillit peqatigiiffiat aningaasanik, pilersaarutaasumik ataavartumillu aserfallatsaaliuinissamut naammattunik akiliisitsisanngippat sillimmatissanillu illuartitsisanngippat.

11) Piginneqatigiilluni inissiaatillit peqatigiiffiat pilersaarutaasumik ataavartumillu aserfallatsaaliuinissamut pilersaarusiorsimanngippat.

12) Piginneqatigiilluni inissiaatillit peqatigiiffiat atorunnaarsinneqarpat, imaluunniit taassuma inissiaatai piginneqatigiilluni inissiatut atorneqarnerminnit allaanerumik atorneqalerpata.

*Imm. 2.* Imm. 1 naapertorlugu pisortanit taarsigassarsiarititat erniaqanngitsut akilersugassaannngitsullu Namminersornerullutik Oqartussanit imaluunniit kommunimit atorunnaarsinneqannginneranni, pissutsit aaqqinneqarnissaat pillugu qaammammik ataatsimik piffissaliilluni tamanna piginneqatigiilluni inissiaatillit peqatigiiffiannut allakkatigut nalunaarutigineqassaaq.

## Kapitali 12

### *Missingersuutit naatsorsuutillu*

**§ 83.** Piginneqatigiilluni inissiaatillit peqatigiiffiata ukioq naatsorsuusiorfigisaa qaammatinik aqqaneq marlunnik sivilussuseqassaaq. Kisiannili piginneqatigiilluni inissiaatillit peqatigiiffiata ukioq naatsorsuusiorfigisaa siulleq sivikinnerusinnaavoq sivilunerusinnaalluniluunniit, taamaattorli sivilunerpaamik qaammatinik 18-inik sivilussuseqarsinnaalluni. Taamatuttaaq piginneqatigiilluni inissiaatillit peqatigiiffiata piffissap naatsorsuusiorfigisassaata allannngortinneqarnissaanut atatillugu piffissaq naatsorsuusiorfusoq sivikinnerusinnaavoq sivilunerusinnaalluniluunniit.

*Imm. 2.* Piginneqatigiilluni inissiaatillit peqatigiiffiat ukiumoortumik naatsorsuutit kingumoortumik misissorneqarnissaannut kukkunerisiusumik naalagaaffimmit akuerisamik imaluunniit kukkunerisiusutut nalunaarsorsimasumik atorfinitsitsissaaq. Kukkunerisiusooq kukkunerisiuinermini allattaavinnut allattuissaaq.

*Imm. 3.* Kukkunerisiusumik naalagaaffimmit akuerisamik imaluunniit kukkunerisiusutut nalunaarsorsimasumik atuinnissamut pisussaaffik sapinngisamik siusissukkut piffissani ukunani atuutilissaaq:

1) Pisinnaatitaanerup nalunaarsorneqarnerani.

2) Piginneqatigiilluni inissiaatillit peqatigiiffiata piginneqatigiilluni inissiaataanik atuilernermi.

*Imm.* 4. Piginneqatigiilluni inissiaatillit peqatigiiffisa missingersuutininik, ukiumoortumik naatsorsuutininik, oqaaseqaatinik kisitsisinillu pingaarnernik suliaqarnissaannut ilusiliinissaannullu Naalakkersuisut maleruagassanik aalajangersaasinnaapput.

**§ 84.** Piginneqatigiilluni inissiaatillit peqatigiiffiat, Namminersornerullutik Oqartussanit imaluunniit kommunimit taarsigassarsilluni piginneqatigiilluni inissianik pisisimasoq, ukiumoortumik naatsorsuutit ataatsimeersuartunit akuerineqarneranni erngerluni ukiumoortumik naatsorsuutit assilinerinik Namminersornerullutik Oqartussanut aamma kommunimut nassiussissaaq.

### Kapitali 13

#### *Piginneqatigiilluni inissiaatillit peqatigiiffiannik atorunnaarsitsineq*

**§ 85.** Piginneqatigiilluni inissiaatillit peqatigiiffiata atorunnaarsinneqarnissaa aammalu piginneqatigiilluni inissiaatillit peqatigiiffiata inissiaataasa inissiatut nammineq pigisatut tunineqarnissaat ataatsimeersuartunit aalajangerneqarsinnaavoq.

*Imm.* 2. Piginneqatigiilluni inissiaatillit peqatigiiffiata inissiaataasa inissiatut nammineq pigisatut tunineqarnissaat siunertaralugu peqatigiiffik atorunnaarsinneqassappat, tamatuma piginneqataasunit tamanit akuerineqartariaqarpoq.

*Imm.* 3. Atorunnaarsitsineq inunnit marlunnit isumagineqassaaq, taassumalu aappaa tassaassaaq eqqartuussissuserisoq akuersisummik pigisaqartoq, aappaalu ataatsimeersuartunit toqqarneqassaaq. Atorunnaarsitsinermi naatsorsuutit inaarutaasut piginneqatigiilluni inissiaatillit peqatigiiffiata kukkunersiuusuanit kukkunersiorneqassapput, aammalu piginneqatigiilluni inissiaatillit peqatigiiffiannut taarsigassarsititsisoqarsimappat Namminersornerullutik Oqartussanut aamma kommunimut nassiunneqassallutik.

*Imm.* 4. Piginneqatigiilluni inissiaatillit peqatigiiffiata atorunnaarsinneqarnerata kingorna pissuussutsit ilanngaaseriikkat piginneqataasunit, piginneqataassutsinut ataasiakkaanut naligitinneqartut naapertorlugit agguarneqassapput.

**§ 86.** § 85, *imm.* 1 naapertorlugu tunisinermut atatillugu piginneqatigiilluni inissiaatillit peqatigiiffiannut Namminersornerullutik Oqartussanit aamma kommunimit taarsigassarsiarititaasimasut piginneqatigiilluni inissiaatillit peqatigiiffiata tiguseqqaarnerani imaluunniit sanaartornerani aningaasartuutaasimasunit inissiamut piginneqataassutit 40%-iannut paarlaassinermut taarsigassarsiarititassanik taarserneqarnissaat piumasarineqarsinnaavoq, annerpaamilli kvadratmeterimut 5.400 koruuninut aamma annerpaamik inissiami inigisap annertussusaanut 110 kvadratmeterinut. Taarsigassarsiarititassat taarsigassarsiat paarlaanneqartut agguaqatigiisinnerat naapertorlugu annertussusilerlugit Namminersornerullutik Oqartussanit aamma kommunimit taarsigassarsiaritinneqassapput.

*Imm.* 2. Piginneqatigiilluni inissiaatillit peqatigiiffiat atorunnaarsinneqartoq, ullormi atorunnaarsitsiviusumi annerpaamik ukiunik 15-inik pisoqaassuseqarpat, paarlaassinissamut taarsigassarsiarititassat ullormit pisinissamik isumaqatigiissutip atsiorneqarfianiit ukiuni 15-ini erniaqartinneqassanngillat akilersugassaassanatillu, tamatumalu kingorna taarsigassarsiat angeqqatigiinnik aningaasartalerlugit ukiuni qulini akilersugassanngortinneqassallutik. Tamatuma kingorna paarlaassinermut taarsigassarsiat ukiumoortumik januaarip ulluisa aallaqqaataanni erniap kisitsisita 3%-pointimik ilallugu januaarip ulluisa aallaqqaataanni atuutilersumik ernialersorneqartassapput.

*Imm. 3.* Piginneqatigiilluni inissiaatillit peqatigiiffiat atorunnaarsinneqartoq, ullormi atorunnaarsitsiviusumi ukiut 15-it sinnerlugit pisoqaassuseqarpat, paarlaassinissamut taarsigassarsiarititassat ullormit pisinissamik isumaqatigiissutip atsiorneqarfianiit ukiuni qulini erniaqartinneqassanngillat akilersugassaassanatillu, tamatumalu kingorna taarsigassarsiat angeqqatigiinnik aningaasartalerlugit ukiuni qulini akilersugassanngortinneqassallutik. Tamatuma kingorna paarlaassinermut taarsigassarsiat ukiumoortumik januaarip ulluisa aallaqqaataanni erniap kisitsisita 3%-pointimik ilallugu januaarip ulluisa aallaqqaataanni atuutilersumik ernialersorneqartassapput.

*Imm. 4.* Piginneqatigiilluni inissiaatillit peqatigiiffianut pisortanit taarsigassarsiaritit aallaqqaammut annertussusaasa, aammalu paarlaassinermut taarsigassarsiaritit nikingassutaat inissiamik nammineq pigisamik pisisup aningaasanngorlugit akilissavai, taamatullu inissiamik nammineq pigisamik pisisup nammineerluni aningaasalersuutissat sinneri isumagissavai.

*Imm. 5.* Namminersornerullutik Oqartussat aamma kommunip taarsigassarsiarititaat inissiap nammineq pigisap qularnaveeqqusiunneratigut qularnaarneqassapput, akilerneqartussanik tulleriinnilersuinermin ingiaqatigiittussanngorlugit inissinneqassallutik. Taarsigassarsianut qularnaveeqqusiussut, pisinnermut akiusumut sinneruttumut, tak. imm. 4 aningaasalersuutissatut inissiaq qularnaveeqqusiullugu taarsigassarsiat, annerpaamik niuernermin akigititaasup 90%-anik, imm. 2 imaluunniit imm. 3 naapertorlugu taarsigassarsiat ilanngaatigalugit annertussuseqartut, akilereernerini akilerneqartussatut inissisimassapput.

*Imm. 6.* Piginnittut nikinneranni imm. 2 aamma imm. 3 naapertorlugit Namminersornerullutik Oqartussat aamma kommunip taarsigassarsiarititaat, annerpaamik niuernermin akigititaasup 90%-anik, imm. 2 imaluunniit imm. 3 naapertorlugu taarsigassarsiat ilanngaatigalugit annertussuseqartut, akilereernerini akilerneqartussatut inissisimassapput.

*Imm. 7.* Inissiami akiitsut saniatigut inissiap nalinga qularnaveeqqusiullugu taarsigassarsiat § 86, imm. 1 naapertorlugu taarsigassarsiat akilerneqareernerini akilerneqartussatut inissinneqassanngillat. Taamaattorli taarsigassarsiat, inissiap nalinganut qaffaataasumik inissiami aserfallatsaaliuinerup nalinginnaasup saniatigut iluarsaassinermut pitsanngorsaanerimullu, kiisalu inissiamik alliliinnermut taarsigassarsiat akilerneqareernerini akilerneqartussatut inissinneqassapput. Taarsigassarsiat akilerneqarnissaasa inissinneqarnerini aningaasartuutitut uppersarsarneqarsimasut, taamaattorli annerpaamik iluarsaassinerit, pitsanngorsaanerit alliliinerillu inissiap nalinganut qaffatsitsisut kisimik tunngavigineqassapput.

*Imm. 8.* Inissiaq sukkulluunniit ikuallattoornissamut anorersuarneranilu ajoqusernissamut qularnaveeqquserneqarsimassaaq.

**§ 87.** Inissiamik nammineq pigisamik pisisup pisinnermut atatillugu aningaasartuutit tamaasa akilissavai, taakkununga ilaallutik teknikkikkut aningaasaqarnikkullu siunnersorteqarnermut, inatsisilerituumik siunnersorteqarnermut, allaffissornermut, aningaasalersuinermut siunnersorteqarnermut, aningaasalersuinermut, piginnittuunerimut uppersarsaatip suliarineqarnerinut kiisalu naqissusiinnermut uppersarsaatinut aningaasartuutit.

**§ 88.** § 86 naapertorlugu paarlaassinermut taarsigassarsiaritit piginnittut nikinneranni akiligassanngortinneqassanngillat.

*Imm. 2.* Taamaattorli paarlaassinermut taarsigassarsiaritit akiligassanngortinneqassapput:

1) Taarsigassarsianut erniat akilersuutillu akilerneqanngippata, aammalu tamanna pillugu allakkatigut

akileeqqussutit taarsigassarsiallimmit tiguneqarneraniit kingusinnerpaamik ullut arfineq marluk qaangiutsinnagit taarsigassarsisup akiitsut akilinngitsuukkat akilersimangippagit.

2) Taarsigassarsiallip inissiaq nammineq pigisaq naammaginnartumik aserfallatsaalinngippagu, aammalu taarsigassarsititsimasumut qularnaveeqqusiissut ajorseriarsinnaappat.

3) Inissiaq nammineq pigisaq inissianik attartortitsisarneq pillugu Inatsisartut peqqussutaanni sukkulluunniit atuuttumi atugassarititaasut unioqqutillugit attartortinneqarpat imaluunniit ineqartumit inummut allamut attartortinneqarpat.

4) Inissiaq minnerpaamik ikuallattoornissamut anorersuarneranilu ajoqusernissamut sillimmaserneqarsimangippat.

*Imm. 3.* Taarsigassarsiallip piffissap qanorluunniit ilinerani paarlaassinermut taarsigassarsiat erniassaannik sulii akilerneqanngitsunik ilassuserlugit, akilersinnaavai.

**§ 89.** Piginneqatigiilluni inissiaatillit peqatigiiffiat atorunnaarsinneqarpat, aammalu inissiat siornatigut pisortat attartortittakkatut inissiaatigisimappagit, tamatumunngalu peqatigitillugu piginneqatigiilluni inissiaatillit peqatigiiffiata inissiaatai inissiatut nammineq pigisatut tunineqarnissaat aalajangerneqarsimangippat, inissiat inissiatut attartortittakkatut nalinginnaasutut inissianik piginnittuusimasunit tiguneqassapput. Piginneqataasimasut inissiani attartortutut najugaqaannarnissamik pisinnaatitaaffeqarput. Attartortitsisup qaammatini sisamani ineqarnermut akiliutit akilerneqarnissaa piimasarisinnaavaa.

*Imm. 2.* Piginneqatigiilluni inissiaatillit peqatigiiffiata atorunnaarsinneqarnerani inissiat inissiatut attartortittakkatut nalinginnaasutut atorneqalernissaat pillugu Naalakkersuisut maleruagassarsinnaapput, taakkununga ilaallutik piginneqatigiilluni inissiaatillit peqatigiiffiannut taarsigassarsiaritit taarsersorneqarnissaannut, aningaasaqarnikkut iluarsisassat allat akilersorneqarnissaannut, attartortut inatsisitigut inissisimaffinut kiisalu attartortut siunissami ineqarnermut akiliutissaasa aalajangersarneqarnissaannut maleruagassat.

## Kapitali 14

*Atuutsitsilernissamut aalajangersakkat aamma ikaarsaarnermut aalajangersakkat*

**§ 90.** Inatsisartut peqqussutaat 1. juli 2008 aallarnerfigalugu atuutilerpoq.

*Imm. 2.* Tamatumunnga peqatigitillugu atorunnaarsinneqarput:

1) Piginneqatigiilluni inissiat pillugit Inatsisartut peqqussutaat nr. 1, 31. oktober 1991-imeersoq.

2) Namminersornerullutik Oqartussat nalunaarutaat nr. 35, 27. august 1990-imeersoq Piginneqatigiilluni inissialiornissannit akuersisarneq pillugu.

3) Piginneqatigiilluni Inissiaatillit Peqatigiiffisa toqqammavissatut malittarisassaatt pillugit Namminersornerullutik Oqartussat nalunaarutaat nr. 13, 25. juni 1992-imeersoq.

*Imm. 3.* Namminersornerullutik Oqartussat kommunillu inissiaataasa attartortittakkat teknikikkut aningaasatigullu nalilivigineqartarnerat pillugu Namminersornerullutik Oqartussat nalunaarutaat nr. 9, 12. maj 2003-meersoq, Inatsisartut peqqussutissaat manna naapertorlugu aalajangersaanikkut allangortinneqarnissami atorunnaarsinneqarnissamilu tungaanut atuutiinnassaaq.

**§ 91.** Piginneqatigiilluni inissiaatillit peqatigiiffinut, 1. juli 2008 sioqqullugu sanasimasunut imaluunniit tigusisimasunut 31. december 2007-imi akigititassap annerpaaffissaata naatsorsorneqartarneranut maleruagassat maannamut atuussimasut akigititassap annerpaaffissaanik naatsorsuinermit tunngavigineqaannassapput.



§ 92. Piginneqatigiilluni inissiaatillit peqatigiiffi 1. juli 2008-mi Namminersornerullutik Oqartussanit aamma kommunimit taarsigassarsitinneqarnissamik neriorsorneqarsimasut, taarsigassarsiassallu sulit tunniunneqarsimanngitsut, Naalakkersuisunut qinnuteqarnermikkut inissiami inigisap angissusiani kvadratmeterimut 6.000 koruunit sinnerlugit taarsigassarsititsiniartarfimmit (realkredit) taarsigassarsinissamut akuerineqarsinnaapput.

§ 93. Piginneqatigiilluni inissiaatillit peqatigiiffi 1. juli 2008-mi Namminersornerullutik Oqartussanit aamma kommunimit taarsigassarsitinneqarnissamik neriorsorneqarsimasut, taarsigassarsiassallu sulit tunniunneqarsimanngitsut, Naalakkersuisunut aamma kommunalbestyrelsimut qinnuteqarnermikkut taarsigassarsitinneqarnissamik neriorsuut pissarsiartik Inatsisartut peqqussutaani matumani maleruagassat malillugit taarsigassarsinissamik neriorsuummik taarsertissinnaavaat.

*Namminersornerullutik Oqartussat, ulloq 16. maj 2008*

Hans Enoksen

/

Kim Kielsen

Ilanngussaq 1

Ilanngussaq 2

**Namminersorlulik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlulik Oqartussat inatsisinut toqqorsiviat

Naalakkersuisut

